

▲ 經濟學論
● 社說

總督申仲憲

今所謂經濟之學。卽古所謂生財之學。理財之學。富強之學是也。經濟二字創自日本人。支那人沿而用之。鄙人著是篇。亦沿其名辭以便閱者。夫欲考經濟學者。要知一國所產出之物貨與夫支配此物貨之場合。而此二事則又生出無數問題。試如欲知一國之產出物。及其支配法。則須究此國之農工商賈。然自農工而商賈。卽爲自產出而支配。其經過界限。必有交通之法子。故須考察其交通之制度。如道路、河川、車船、電信之便利何若。况只就商賈一事上論。則商買之魂。在於銀錢。故又須考究其金融之政。若是。則經濟學固兼知地輿學、政治學、法律學。而成爲一具體之學也。

是學盛於歐美之各富強國。其在亞東則紀元前五世紀。支那古賢有曰。生財有大道。生之者衆。食之者寡。爲之者疾。用之者舒。則財常足矣。孟子說政治。亦陳農桑教養等寔事。是則亞東人之關心經濟學者。非一日矣。戰國時列國相爭。英俊之士。爭談富強之說。漢唐而後。專尚文章。而以理財學爲鄙。至宋神宗時。王安石欲行新政。以廣財源。卒爲時儒所斥。其法終不見效。自此而後。未聞有人專長於經濟學。日本自維新後。國人多往歐美遊學。考究兵財、航海、法律、技藝等科。其間有長於經濟學者。歸教國人。故其國日臻富厚。而支那人自數十年來。亦多遊外國以從事是學。我南國則對於經濟一科。古來未之研究。全權沙露大人深鑒乎此。故於前次建節南土之辰。曾勸府中財政司長巴拉尼耳大人(Brenier)著一書。名爲東洋地輿統計(Atlas statistique de l'Indochine)。以助經濟學之考究。及今貴大臣再蒞我土。節次演說。每以開廣財源爲言。而我

皇上卽位。亦辰常以開民智廣民財等要政。諮詢訓諭諸臣。誠仰見我皇上暨貴全權大臣同心圖治之至意。吾人生際其辰。承上人振作鼓勵之機會。當如何敦本務實。以克副上人之心。以無負國民之責。以裕我同胞兄弟生活之前途。鄙人非長於經濟學。惟粗解一二。不嫌淺陋。姑摘取於巴拉尼耳所著書之數目。及附已見草是篇。以貢我同人之有志是學者。

夫欲富其國者。須知其國之土地之人民。此二問題。乃爲經濟學之急務。試觀我國土地。則北夾中國。南至高蠻。西接哀牢。東界支那海。地方三十一萬一千方百方箕羅米。六千方
內北折十五萬五千方箕羅米。中折十五萬五千方箕羅米。南折五萬

此三十一萬方箕羅米。卽爲三十一兆西畝也。而於此三十一兆西畝之國土。又非全數盡皆耕作。卽如南折土地肥饒。甲於諸轄。開墾甚易。而折轄內共五兆六十萬西畝。現今南人耕植只得一兆四十三萬畝。西人耕植只得二十一萬六千畝。存三兆餘畝。尙屬荒莽未開之地。中北兩折。已耕植之田土數千。未得其詳。仍想不過僅達三分之一之數而已。且此兩折田土不明之故。以其稽究甚難。他若南折。則屬大法國之行政權。田土各有圖簿。明白易考。况三折算田之法各別。南折則從新法計算。每畝成西尺三千六百方尺。然此乃官制。若民間則隨其省轄。隨其風俗。復有私制存焉。有處則以一畝分爲十高。高爲十五尺。尺爲十寸者。有處則以一畝分爲十高。高爲十吋。或十五吋者。有處則以一畝分爲十高。高爲五伍者。又如諒山省地轄。全是山地。民間不知高畝。只以坎計。如云此處田幾坎。用秧幾斤者。茲若飭開田土。各社只照隨鄉俗計呈。其計算甚屬艱著。若夫田簿之設立。雖起始於嘉隆四年。當初例定六年大修三年小修。而自此至茲。未見修整。有社則被失落。只留存補稅簿者。有社尙守嘉隆年原簿。而經百年餘。紙已破裂。或失字跡者。况其間處所混淆。畝

高失寔。或地主遞遷。而名呼差異。或桑滄屢變。而多少不符。似此田簿不足引爲確據。動有勘察。寔覺頗難。政府已知此弊。欲行改良整度。但現今只聽各社僅炤舊法雇人而整度之。徒費資而無補於寔事。若炤新法如南圻之算田法。以行釐整。則精於此術者。尙鮮其人。夫測地之制未行。則固爲國家經濟學之阻礙。政府早計乎此。故度田學堂之設。教我南人。蓋將於歐戰結局之後。方爲我國田土釐改。此時倘於一圻內。有度士五十餘人。勘度田土。及描畫圖本。則須達二十五年之工程。方能奏績。予知夫我國須到何日。有明白之田土簿。而經濟學從此始進一步矣。

次言乎民數。北圻六兆人。內南人種族五兆三十萬人。他種族七十萬人。中圻五兆人。內南人種族四兆五十萬人。他種族五十萬人。南圻三兆人。內南人種族二兆六十萬人。他種族四萬人。統計三圻十四兆人。而南人種族十二兆四十萬人。他種族一兆六十萬人。所謂他種族者。如北圻之儂士苗蠻泰。中圻與南圻之山蠻及占城餘裔是也。彼雖非南人種族。而居於南國土。受治於南國之法律。並不屬於何國。則炤法律上。均是南人。然此十四兆南國人。乃是倣定之約數。而非詳盡之確數。蓋由我國只有丁籍而無戶籍也。夫所謂丁籍者。乃社村內壯丁自十八歲至六十歲之籍也。所謂戶籍者。男婦老幼生死嫁娶之籍也。丁籍用以定稅額。戶籍用以詳知一國之人口。我南非全無戶籍。如在京之尊人府。掌皇族之戶籍。凡皇族中人之生死嫁娶。須由尊府開敍著籍。教民亦有戶籍。凡教民之生死嫁娶。須就教堂行禮。著入教籍。此其大缺點也。南圻之民。因隸屬於大法之治下。故戶籍已早日成立。若夫北圻。則於一千九百六年。統使大臣通咨設立各社戶籍。而民間慣於舊習。未能一律遵行。且戶籍之欠缺。其阻礙不少。無論謀國家之經濟者。無以知其國之人數食口用度。而卽於政治上。亦生種種困難。試如有一人請改年庚。稱當初里長誤開。倘無

摘抄開生簿。則上官不知伊人生的何年。又如有一婦人。單叫其夫往法從征。陣亡乞恤。倘無有嫁娶簿。則不知此婦的是亡兵之配。又如有一人外出營商。不幸物故。原貫里長。仍責親屬代納搜稅。迨至單乞除籍。倘無死簿。則上官不知準否。何從。凡這等款。必須催證開究。間或不寔。而拖累于人。在所必有。予知夫一自新律施行之後。吾民方有明白之戶籍。而經濟學從此又進一步矣。

且田簿與戶籍。二者非惟經濟家所當研究。而凡執政者亦當了然於心中。而不可摸糊視之也。試如秉家政者。須知其家所有之田土。之人口。收入幾何。支出幾何。然後始能量入爲出。使家計不至支絀。治國亦然。須知其國之土地。之人口。之產物。之支用。然後始能爲國人謀樂利。此釐正田畝。修整戶籍。乃政府行政之必要。其有關於人民生活之前途不少也。惟吾民不解此義。一有飭問丁田之數。則民間恐增加稅額。尋方隱漏。政府何由得知寔數以圖國民之生計乎。

按有丁田。必有稅額。此其常例。我民宜知。凡擔受租稅者。乃國民之天職。政府之征收稅額者。特不過足贍國用已耳。若丁田數多。則其負擔之範圍廣。國家之用途不至支絀。而凡爲國民開拓之新事業。可以逐漸舉行。其爲利不鮮。現今我國凡百政治方急改良。若能裕稅額。則從前原有之丁田稅。不至增重其負擔。取於此以償於彼。又何至於病民乎。况人民能使政府得知其田簿戶籍之寔數。則一年間之收入。之支用。政府必能和盤炤算。爲人民支配其生活之途。縱遇荒歉之年。亦可免用度之告罄。間嘗觀文明國。凡民間富者之物力。及一年內所得之花利。如粟米各類。皆有簿冊。政府可以知其寔數。於是政府計其年間所入之品。及人民之食用。如有不贍者。則須爲先事之防。或許外貨入港。或設法以平沽。使人民不至於坐困。况政府

能知國中人民之寔數。及其財產資力。則對於國防。於外交手段。方有正確之把握。何也。知彼知己。對付自容易也。

阮伯卓附誌

我亞東惟日本國。早了解乎此中之便利。又勇於改良。故其國已著富強之效。若支那則田簿與戶籍。尙茫然無所考究。(支那非僅無戶籍。并如我南之丁籍亦俱無之。)故進步頗覺遲鈍。余嘗觀支那某政客。曾請勘度田土。描畫圖本。謂可因此田土增價三倍。余竊想此言。亦出於太過。某政客縱無現款。而欲以此田畝就典於銀行。則銀行主人。只就戶籍員稽查。不必請證於耆里。勘度於田畝。一利也。買賣之辰。不生轉轄。訴訟之際。究處易明。二利也。財產之契約。已著入簿。縱有遺失。易於查究。三利也。抑某政客無亦以此三利而謂之三倍其價歟。

雖田簿未修。固經濟家考究上之困難。然凡關於治生之道者。豈可因此而退步乎。况人民之義務。在於開財源以富其國。而我國一業農之國也。則宜廣其農利之必要。據現情而言。則雖未詳知已開拓之田土幾何。然亦已知夫尙留荒之土地必居其太半。倘能從事開闢。以應用此荒土。則其利又何可量哉。或者曰。凡產出物項。須計其消售之途。現今鄰我各國。米之出港者。緬甸居其首。全年出米二兆四十萬噸。東洋次之。全年一兆三萬八千噸。暹羅又次之。全年八十三萬噸。倘吾人增開田畝。而此暹羅等國。亦增開自己之荒田。一旦粟米太多。消售不洩。能無有壅塞之弊。且又專以農爲業。偶遇荒歉之歲。何以聊生乎。然以予觀之。舉國專業於田畝。雖於謀生之道。頗嫌太狹。若夫多米之事。固不足爲憂。蓋吾國除南圻之民。多產穀米。食用充足外。他若中北兩圻之民。而全食米者。

不過其半。其餘則間食芋豆蜀麥或蔬菜者多矣。非惟年在彊壯者多用此以療饑。而即至童幼之兒。其衛養亦大都如是。故村野間常見無數兒童。多有衣不蔽膚。形容瘦瘠。如病人一般者。以其失所養也。夫幼而失養。長大何爲。不見夫近日大法官選兵如西。應募者不少。而被淘汰者十之七八。皆由不中格。或病或羸弱之故。夫國民之羸弱。即爲將來種族衰落之最大險象。想有心於社會者。不可以恝然視也。使吾國米之出產多。則非惟足以贍養國內之民。以強吾種。而併可外兌以收其利源。且又環我國者。皆食米之國。如中國民數約四百餘兆人。印度三百餘兆人。日本五十餘兆人。南洋羣島三十餘兆人。統計其待需於米以生活者。則於我國之附近。又有八百兆人之衆。而此各國所產之米。不足供用。觀此則足知吾國若能盡闢其田疇。樹藝百穀。想亦不至有多米之患。况吾國之土地。非盡是低原。只供爲禾田者。其間可種植桑、蔗、歌咾、橡皮膠、蜀麥及各種生油樹木之土地者。頗屬不少。能擴張此物產之利。則將來之入款。其興旺又何可量哉。

自歐戰開幕。法國諸屬地民。或以力或以財。供輸贊助。統計各屬地人民。其不能從征而捐銀助給。其因戰事被傷之法民者。總數達十五兆七十萬佛蘭有奇。而其間我東洋所捐助。已達七兆九十一萬餘佛蘭之額。若然則東洋寔占全屬地各部份之過半數。大法人因此感激。間有提議云。從前法國買外國之物品。每年至四千五百兆佛蘭之多。及其有事。則惟諸屬地輸助爲最。倘法國以其兌買外貨之金額。而先行採買於各屬地。則可助各屬地之經濟。而法國與屬地之感情。亦因此愈日親密。法政府亦表此同意。想歐戰終結之後。法國與諸屬地財源之交互。更較勝於前。而我國之商業。從此蒸蒸日上矣。余今試以法國所切需之物項。及吾國所出兌之數。略舉列表如左。

一年間之度

物品	法國買入數	各屬地供兌數	其間南國供兌數
絲	四千三百四十七噸	內我國一百九十噸	
蜀麥	五百六十三噸	內東洋十三萬三千二百七十五噸	
椰菓草麻	四十五萬二千	八十一噸	
種油落花生各	十六萬七千	內東洋七千九百	
歌啡	二百十一噸	一千二百七十五噸	
橡皮膠即 俗名高趨	十五萬噸	一千二百七十五噸	
一百九十五噸	二千五百九	一千二百七十五噸	
十四噸	二千三百二	一千二百七十五噸	
三噸	內東洋五百十	一千二百七十五噸	

由上觀之。則法國各屬地之所產。不足以供法國之用。將來若能增植這等物料。當不患其消售之無路。惟絲與蜀麥及各生油之品。吾國人栽植之已久。故供出亦稍占多數。他若橡皮膠、歌啡等種。現方新植。未甚興旺。橡皮樹似宜於中圻及南圻之地。歌啡之植。則於橫山以北為適宜。橡皮之利。余固未得知其詳。至如歌啡。則自投種至結核。當達五年。每南畝可種三百株。計費綜在三百元內。而五年結核之後。每株於一年間除各費外。可收利錢三毛以上。是則共

一南畝。於一年間可得九十元之利金。比之禾穀蜀麥。其價倍蓰。況宜種歌啡之地。均是高土。不能用爲種稻穀之地。使吾人廣植歌啡樹。則將來非惟足供法國之採買。而且又能輸出於歐洲各國。其獲利豈淺鮮哉。

又試觀我國林海之利。我國山林。幾占全國之半部份。而從前政府不曾經理。只目爲嵐障之地。終付附近山民。隨便取利而已。而北圻上游之苗民。與中圻之山蠻。慣於焚林之習。為害不少。自保護政府設檢林局。經理有人。而此後所取之林利。亦得其度。即如孟子所謂斧斤以辰入山林者是也。據一千九百十一年檢林局之調查。則於年中。北圻割取各項材木。達二十九萬二千四百三十七

立尺。中圻八萬九千七百六十立尺。南圻三十五萬六千九百四十四立尺。此數想未得其寔。何也。中圻山林多於南圻。民數亦倍。而全年所取之材木。又僅等南圻四分之一。是可疑也。此無亦中圻各省都有林份。分爲各個源頭。致檢林官檢顧不週。不能詳知其寔數耶。然而林利非只材木已也。類如紫蟻、黃蠟、沙仁子、安息香等料。都是必需之商品。其中又有禹餘糧一項。將來可爲出品之一大尊。現今每年此項出港。自二千九百九十四噸至七千三百五十噸不等。但此特不過居民僅取天然之產。以供消售已耳。若此求利於自然界。必有竭林而取之之一日。倘能尋培植之方法。庶可保利源日進於無窮。

我國海岸。自海寧省之北界。至清化省之馬江口。長六百箕羅米。自馬江口至南圻之芹蔭海口。長二千二百箕羅米。自芹蔭至河仙。長約六百箕羅米。綜海線之長度。約共二千四百箕羅米。有奇。沿海之民。以漁爲業。雖器具尙粗。而北圻每年載往中國之鮮魚。自八百三十一噸至二千六十六噸。不等。他若中國之漁人。就北圻海分攻魚者。更多於我國漁人之數。每年東洋乾魚鹹魚之出港者。自一萬六千七百餘噸。至三萬二千八百餘噸。鹹水之出港者。自一萬二千餘噸。至一萬四千餘噸。海鹽之所出。則每年可達七萬七千餘噸。至二十三萬餘噸之數。而出港者。則有三萬二千八百餘噸。由此觀之。則倘吾民能知改良自己之漁業。則漁利日盛。而出港之數。當必有增而無減。又屬廣順。南慶和二省之海分。各有燕島。其所出之燕窩。固爲無上之食品。較於中國之官燕。其珍貴不知幾倍。故中國人多嗜好之。以余得之傳聞。我國有一種白燕。頭下有白羽常居於海島小穴之間。每年只於春間產三卵。產期各結窩。而第一期與第二期之燕窩。都爲燕戶所拔取。故窩失而卵落矣。只留第三期之燕窩。能留得一燕子。而至此則燕母已勞。故其產出。比於第一第二期稍小。果爾。則燕種能

無日就消滅。而利且不繼。政府亦宜再定燕稅及取燕之法。使之燕種日盛。庶利源可以延長乎。

◎ 專件

未完

范撫臺答政廳書

前月政廳馬先生以左一書示。且謂因政廳曾以法政高等學堂設立之目的。諮詢於太平省范撫臺。以廣求意見。忽撫臺以此書答復。準登諸報。以公閱者。爰錄登之如左。

上略竊思敝國官場日下愈況。非科舉之流弊也。特人爲之弊耳。何也。廉恥之心死。而苞苴之惡感。傳染太深。舊朽輩如樹者。淹淹老啞。欲言欲泣。無補於時。乃起視滾滾新少年。服文明之服。言文明之言。造所行非文明之行。此可爲敝國後運悲也。

保護政府。特急於爲國儲材。改良試法。取士學堂。心良苦矣。意良美矣。乃成績鮮良。無他。廉恥魂消。視名利爲賭場。一得而思以取償。劣跡殆不可復問矣。茲奉擬於河內。改立一法政高等學堂。合中南北三圻而教育之。卒業卽爲舉人項。派充各政治公衙參辦。何人欲補府縣。須由京試。方得錄用。初念以爲周到。乃繼思之。恐有不便者二焉。一是不適國人之程度。敝國人才。非無聰敏。但法字漢字。勢難兼以精通。博得法政高等卒業文憑。精力竭矣。却又改從漢學。所得之糟粕幾何。僥倖應舉。斷無寔際。其不便一也。二是恐導仕學之蹊徑。無論何等流品。何等資格。一入法政學堂。腦界便營營然有補官之夢想。乃格於京試。思一獵獲。其不爲詭遇也。幾希。當此道德功利互爭。爲消長之辰期。竇孔一開。穿鑽百出。禁之殆不能禁。亦防之殆不勝防也。其不便二也。不寧惟是。古者用人不拘一格。

敝國當初非專科舉。有由吏典而首相者如阮知方。有由募勇而總督者如陶有志。兩公卒能大有樹立。馳名郡朝。與科榜中潘清簡范富庶諸賢並紀名臣列傳。端由俗尚廉恥。宦途肅清。迄能廣收得人之效。茲若畫定補官必由京試。寧非失之太狹。未論京試程式如何。但云或來京學習。或自家略通漢文。乃可應舉。是殆以漢文三數題爲官界。三十年結果。正恐漢學未通。勉取中。非惟無益。且又生弊。一生喫著在此三場之等結想行復令人皆病狂矣。且漢學淵微。如欲保存。非設爲專門。斷無片益。日下國文漸已發達。持學論者。當公認爲普通教課之本位。格致專從歐學。倫理附以漢文。必如此方適國人之腦界。若強以兩途並進。何啻雙手捕魚。左持右携。悉竟歸於烏有。姑舉廢生核課漢文。贅味且幾於不容喙矣。何況京試乃一最大問題也哉。爲今方便。想應先由法政高等學堂卒業。補充各衙參辦。俾之學習政事。待年到三十。炤本朝明命舉知例。何員有上憲舉知者。方得分補府縣。試政一年。併行月考歲會之法。何係拙劣不舉職者。退還參辦。其舉知之上憲。別有處分。就中陞至省堂首自按察須有試格。如貴官派之試五項該治者。一般試場。設在京城中者。必須廷對一遭。遵舉瞻觀故例。表重體也。補用不拘南北。存公道也。要之重廉恥戒僥倖。醒官界一切之迷夢魂。所恃乎監制南政之最猛報力。南風報界。如日競耶。樹雖不才。敢請爲之旗鼓。
(下略)

陽曆一千九百十七年八月十六日

● 讀范撫臺書附意見書後

阮伯卓

太平備撫檀園范文樹頓復

范撫臺大人。以大政治家爲我人所敬慕崇拜者。已多日矣。今復書致政府。結之以監制南政之大

毅力。期之報館。而且又對於本雜誌。得一贊成之語。直達於政府。願爲之旗鼓。本誌纔一出世。得此大幸之名譽。將來報界之發達。能不感我撫臺知己之恩耶。世人凡得一知己者。則凡所懷之見地。當忠言以求其取正。想撫臺亦所樂聞而有以教之者。撫臺這書中。以經驗之見地。計用人之前途。言之亹亹。其深慮遠見。可謂周到矣。前一段明言官場之積弊。苞苴盛而廉恥亡。爲國悲。爲少年悲。并爲自身悲。淋漓慷慨。無異賈生痛哭。夫撫臺乃官場中之一也。而迫於不得不言之際。毅然摘舉其弊。是則官界之近狀何如。流品何如。遂令我撫臺隱之不能隱。諱之不能諱。故寫出魑魅魍魎之情態。以向政府直陳也。讀撫臺書。而知我撫臺愛公道之秤衡。洞幾微之罅隙。非深得於政治之歷閱者。曷能明瞭若是。然記者不能不略陳意見。以與大家商確。非敢曰辯。特備葛蕘之一採焉耳。

現下法政學堂之設。其組織何如。記者亦會訪諸政府要人。略敍於前期社說題內矣。據我撫臺所謂法政學之與京試。有不便者二。其致慮非不周到。然以鄙意思之。想撫臺亦誤解今後之法政高等學堂。亦猶之昔辰之仕宦候補等各場。故致有此疑慮耳。法政學之細則。另作後敍。今記者請以法政學與用官之分途解析言之。法政者。特一實業學耳。無異於醫學工學農學等學校也。法政學又在普通學之上。非是如昔時之名爲學政治。而尙終日研究格致倫理等科也。是以今之考取法政學堂學生。當以有普通學卒業爲必要。蓋其目的在使我法政學人材增高其階級也。

何以法政學亦謂之寔業學。蓋學得寔用。以供職於公衙之人也。如醫院則有醫生。工局則有技師。農局則有幹事。豈於公衙中。復無有人焉。如醫生如技師如幹事之程度者。以輔佐長官。而辦公衙。

之事乎。其人者何。卽謂之參辦。當如何以造就此參辦人物乎。則有法政學堂。法政學堂卒業之學生。是有辦公之資格。而未有得官之資格也。

法政學堂之設。其目的只在養成有寔用之人才。或擇何種文字而教之。隨其適合已耳。使我國而既有法政學之國語教科書。則以國文教國人亦爲簡便。然此等問題。非待到五十年以後不可。故現時之計。爲其易於擇教員與教科書。則以法文爲便。况旣考取在普通學堂卒業之學生以入學。則當必減少學語之精力。而可專從事於研究法政。

法政學生。其資格只在辦公。而非是做官。做官者法政學以上之人物也。欲求得此等人。物。則當於何證明之。於是乎有考試。考試之法。各國皆行之。非特一考足以證明斯人之有才。卽亦由此一考之取中。而使國民皆公認其人之有做官資格。以見重於臨政時也。

若是則考試之程度。乃考法政應用之人物。非若昔時之以文章取士也。且做官之資格。非特精於法政之智識。而且須有應世之通才。故考試時想亦預設應用之試題以問士。如臨時之行政司法等事。及屬於本朝做官必要之典例云者。其間又附攷以漢文一題。是何所取。蓋我國現時文字未及統一。教育雖能施之一般學生。而未可遍於國中之民衆。官吏者乃與民衆直接者也。既與之直接。則須通曉彼民衆所用之文字。試如有四十歲以上之村民。欲以事訴官。而只能寫一漢文告狀者。或如有訟事而必附釘嗣德年以前之文契者。使坐公堂上之人物。而不略通此等告狀文契。則將何審究乎。是故附以此一題。以策勵學成後之當用力考究耳。據如我撫臺書中所言。則撫臺正恐如昔辰詞章之考試三場。全以漢文取士。故指之爲不便。然此豈政府

之意哉。政府之提及漢文一層。特不過附題耳。我國現時未能化一國之民而盡新之。而行政司法上。又不可置舊民於不理。是以擇人當以通才爲必要。何況朝廷凡百典例。猶用漢字。豈有做官者而可不與朝廷相關乎。想如我撫臺言。則僅屬於辦公人之資格。而非屬於做官人之資格也。

且炤政府所擬。須有法政高等卒業文憑。方可入試。是則先由學堂以練其涵養力。後由考試以驗其應變才。法至周矣。撫臺謂應試則有詭遇、獵獲之弊。記者竊想如撫臺言。果爾國民無廉恥心。則應試而詭遇者尙少。不應試而詭遇者更萬萬於應試也。何也。京試者。有帝權之監督其上。有保護政府之證見其傍。考官設一會同。試題必歸於一致。體何重也。法何嚴也。用人之資格。何如其齊一也。縱有心存不羈。思詭遇以獵取功名。然或得助於考官者。猶因逼近於帝權及貴官之耳目下。而稍生畏葸。縱濫竽者。僅百之一二耳。若不由考試而用人。則其弊伊於胡底。撫臺又援國朝當初逾格用人之典。如阮公知方以吏典而登首相。如陶公有志以募勇而官總督。卒能成一代之名臣。爲說。噫。此實一時之知遇。必其人如阮陶二公。必盡國之人如阮陶二公。方可破格援此爲成例。若夫道德功利互爭爲消長之辰期。欲不由考試而期在得人。想戛戛乎其難矣。記者竊想知遇之恩。無時不有。然此正屬君主一人知人之明。若夫通常之用人。必有成例而後可。據如撫臺所引明命年間舉知之例。謂府縣由上憲舉知。試政然後行月考歲會之法。竊想此例行之明命年間可也。而行之今日。則有不便。何也。據撫臺言。今日廉恥魂消。視名利爲賭場。則社會上之良心何如。大概可見矣。上憲云者。亦社

會中之一人也。上憲者亦當有京試場考員之資格也。京試而撫臺猶不敢信。而撫臺敢必信舉知之上憲乎。考官者以十餘人共議於一席也。上憲舉知則得以一人之意思操可否權也。考官則與試士太懸隔。上憲則與屬吏本相親。太懸隔者其用情難。本相親者其用情易。况屬吏對於上憲必平日已曉其人之性情。善承意而逢迎之。則舉知必矣。以中北兩圻三十餘省必有三十餘之上憲。無論用情與否。誰爲上憲者而不欲作成屬吏一二入乎。然則一年之間。相率而舉知。而政府無地盡用。又恐其間有才學而秉性慷慨者。則無一人知而舉之。終身必無出頭之望矣。如曰舉知試政後復加之月考歲會。而月考歲會者。又復一上憲也。能不勞彼求做官者。旣鑽營於舉知之前。復逢迎於舉知之後。月復一月。歲復一歲。而做官之資格何如。可描畫而知之矣。如曰以處分律裁制上憲。則試問斯時也。議處分者誰耶。又一上憲也。使其人能以逢迎得上憲之許可。則將從何知其劣跡而處分乎。

我撫臺欲懲試法之流弊。迫而援此舊典。然想撫臺一再思之。應自了解。無容記者之絮絮矣。况政府現欲政治上之齊一。故不得不別設一試途以求做官資格之齊一。向來用人之權。已逾越於軌轍外。今我南國上有長君。保護政府欲聯絡南北之政治法律。贊助我國之帝權。以整頓一切。故凡出身做官者。必由京試。保護政府之用意。原有在也。且又炤之貴官派考試該治官之格式。與此京試。亦甚爲符合。貴官派凡各參辦者。必經一度考試。中格者得公認爲做官資格。充入該治官。此後以次超陞。不復有考試。卽如今後我國各參辦。須由一度京試。試中者得公認爲有做官資格。充補府縣。此後以次超陞。不復有考試。今撫臺又定陞

至省官首自按察須有試格此不誠太勞乎夫出身行政之初卽已成其爲官界中人矣而府縣者官界之初階也考試云者認其有做官資格也今不先試之於做府縣時而必待陞省官而後考然則前乎此可置之不問乎又試如一考而不中則做官之資格已失斯時也復用之爲府縣則府縣乃官界也使其無做官資格之認許以當職行政則何以見解於國民何以致答於各公衙之參辨不然則將因此試不中格而斥於官界之外乎此寔最大疑題也如曰考試者不在乎認做官資格然則何必用此炤例之考試乎此寔記者有所未解也

要之我撫臺因監乎我國人入學根性補官夢想之太於營營以損壞其國民之資格我撫臺又監乎詞章舊學科舉積弊之全無寔用而出此懲羹吹齊因噎廢食之難得已雖然非學之貽弊非文字之貽弊非科舉之貽弊致弊者在乎人心而已今記者請有一語以告諸我同人曰法政學者特一專科之學也非入法政學而可昂然自謂必爲官界中人也考試者認其專科學有應用之才如其他各科學成之後又經考驗而得認之爲某科博士也非是國中只有此一途能致富貴居人上而此外別無他事業也做官云者担社會上之一份責任猶之乎專於醫於農於工於商之有益於社會也非是博得一官只有權利而無義務而必營營然謀取債務獵獲如我撫臺之所憂也今我同人有疑於法政之學是如何規式乎記者請於下期舉一成例以表示之

◎ ● 文學

法國學術之評論

今我國人一談及學術者。孰不曰以大法之學術爲標本。然吾儕欲祖法大法國之學術。則亦當知大法國學術上之精神者是何所在乎。

夫欲解明大法學術之精神。則當深曉大法人之性情之思想而後可。此等趣旨。則想凡法學深造之諸君子。當自了如矣。然吾儕謹就其管見所及。試舉以質諸我同人者。

試考大法國名士偉多爾 (Victor Giraud) 先生所著之法國文明 (*La Civilisation Française*) 一論題。其間多足以闡發法國文明學術之真正精神。此精神者何在。蓋可總括名之以一語曰。端的是重人道之學術是也。法國著名小說家曾編述一亞撒人某氏之歷史。其間敍某氏本法籍。有愛祖國之特性。然於德攻亞撒時。不欲歸法。願留此充德兵役。以保存祖國之文明學術。卒能於一年間爲彼殘暴之德人所感化。及其期滿歸國。臨別時彼德國之官軍猶殷勤告語曰。『當知法人人道之觀念。較勝於各國人。』夫法人人道之觀念。較勝於各國人。此一語也。誠足以表明法國文明學術之精神。蓋法國之民族。乃一重人道之民族也。有一詩人曾有句曰。『余愈爲法蘭西人。則余愈見余之爲人。』 (*Plus je suis Français plus je me sens humain*) 蓋法蘭西之國性。未嘗與人類之良心相背馳也。

若是則法國之文明學術。全是由人道之本質所發闡。吾儕試就偉多爾先生所著之論題中。而研究法國學術之各部分。先生分法國學術之發現有四種。即文章、哲學、宗教、歷史是也。

今試言夫法國之文章。——文章者乃一國家一民族精神上特質上自然之形影也。試以各國之文章與法之文章相比較。如意大利之文章。則偏重在美術。俄羅斯之文章。則偏重在神祕。英吉利之文章。則偏重在詩味。德意志之文章。則偏重在哲理。而法國之文章則異是。法人之文章。純以人道爲主。其作文也。法人只先從各人之情景之人性之意思。詳細攷察。一凡所標示之題目。皆爲與人類有關係之題目。如屬於道理。或屬於社會云者。推各文學家之主意。蓋原爲公衆起見。以普及之文章。研究其所以處世應物之要道。而不曾以磊落特別之意見。轉自求一己之超越也。要而言之。則法國之文章。蓋以人道傳播於世界之文章也。偉多爾先生。又分爲各時代。以證明法國學術之經過。

於法國文學史中有著名之兩時代。即爲十七世紀與十八世紀是也。此兩時期。其發起雖殊。而歸向則一。十七世紀。則爲古典之時期。十八世紀。則爲革命之時期。屬於古典時期。則各著述家研究人類之心理者。以人類爲虛慌變轉混雜之一種。曾考驗爲人性本惡。故須裁制其慾情。使社會不至於紊亂。此各著述家之著書立說。只以維持社會爲目的。要而言之。則十七世紀之文章。乃在乎矯世警時。以謀公衆之益利也。屬於革命時期。則凡著述家。只研究屬於人類之幸福問題。凡昔日以裁制爲幸福。至此則又以自由爲幸福。昔日以維持爲目的。至此又以破壞爲目的。昔日之所考察者。謂人性本惡。至當日之所考察者。則謂人性本善。惟其性本善。則凡各煩惱困苦之光景。皆由社會而生。社會若日就於頽敗。則須破壞之。以回復人類之本性。是以各文人常排擊社會。而贊揚太古時代爲人類之黃金時代也。由此觀之。則十七與十八世紀之兩時期。其主張雖異。而要之亦在乎爲人類求達快樂之幸福。是皆重在人道而已。

試觀大法人古來所出版之書籍。如 Roland 之英雄歌。Corneille 氏之戲劇篇。孟德斯鳩之萬法精理。Lamartine 氏之詩文。George Sand 女士之小說。以至於 Sainte Beuve 公之雜說。則法國之文章。雖五光十色。各現其異彩。然全是從生人之各境遇。詳細考察。此非同以人道爲尊旨乎。

要之法國之文章有三特性。一曰分晰。二曰簡易。三曰誠寔。是蓋由從人道起見。故其作文不得不爲普及之傳播也。各國人之作文也。務爲超越難曉。以求自己之快樂。大法人之作文也。務在通常易曉。以求各人之快樂。故近今萬國交際上。多用法文。是可見法國文章對於各國文章之優點也。且言夫法國之哲學。——欲解明法國哲學之特性者。則試以德之哲學相比較可概見矣。且德國向來本以專攻哲學。自命於世界。其結果何似。則已彰然於今日之戰局中。吾儕無容贅說。只就形式上觀察。則法國哲學。較之德國哲學。絕對成其爲反比例。德國以哲學乃爲一小部分。各人私授受之專科。其所發闡之思想。不務於此外之事。寔相對照。以是德之哲學。多暗昧秘密。其究極也。高則過於超越。低則流於粗鄙矣。法國之哲學不然。法人以哲學爲各有智識有學問者公共考究之學科。凡人生無不有推測思想之資格。則人人皆能自己領會。判斷其世間之眞理。而哲學家凡發明一理想。研究一事物。則須以之公佈於世。緣是而法國之哲學家。復兼有文學家之文章。而法國之文學家。常帶有哲學家之資格。試觀文學家如 Bossuet, Voltaire, Lamennais, Taine, Renan, 各先生。則誠可與哲學著名之諸人物相颉颃對峙。而卽至單純是文章派之 Corneille, Molière, Racine 各先生。亦無不有自家特別之哲學。卽爲對於世界對於人類之觀念者是。此哲學則已普及於各著述家之辭調中也。且也。法國之哲學家。非特精於格致學。而且又精於理學。如 Descartes, Pascal, Auguste Comte, Cournot, Claude Bernard, Henri Poincaré, 諸先生。則哲學科學兩皆深造。若是故能

得兩方面之利益。凡對於哲學家之觀察原理者。則能以寃際爲根本。而不慮其流於荒唐。對於科學家之考驗物質者。則能以原理爲歸納。而不致失於繁瑣。况又法國之特性原不以哲學爲一人之武斷。閑坐以構造思想之樓臺。不假依伴不假根據者。此德國之哲學也。法之哲學。則專務事寃。未嘗以自己之學說爲自己之樊籠。而不敢越出範圍外以觀察事物。蓋法人謂世人之考察眞理者。有千軌百轍。則其思想之界。宜任自由。是故法人之哲學。其合乎寃際。則較優於各國耳。

總而言之。則法國之哲學。只重乎人類最切要之各問題。故解明人類心情上之秘訣。以考察世界事物上之秘訣。是猶愈於世人只以思想爲局上之棋子。試用之以較勝負。又以思想爲沙中之磚瓦。試用之以構造無形之樓臺者哉。偉多爾先生有曰。須使人能完全其爲人。順其自然之本性。勿過於推尊而亦勿過於污穢。宜認明彼之界限。發達彼之潛力。宜調和彼之阻力。此蓋法國古來哲學之理想。曾宣播於天下人所共見也。彼世人懷有驕矜之理想者。安得若法哲學之渾厚廣大者乎。由是觀之。則宜乎謂法國哲學爲富於人道觀念之哲學也。

且言夫法國之尊教。——今謂哲學者爲識者。社會之尊教者爲通常人民之哲學。亦無不可。何也。通常人民原占國中之大多數。而尊教則正爲國中公衆希望心所信仰之地也。法國古來本以羅馬天主教爲國教。天主教會有作成法國之德。而法國亦有翼護天主教之功。至今猶得名。法國爲教會之長女。是則法國之與天主教聲氣之相結合。夫豈云淺鮮乎哉。

然則今吾儕試思在法國天主教之特性。爲何如者乎。夫教會中之統系之規式。則法國無以異於各國也。然大抵同一教會。而在各國之趨向各異。如意大利之天主教。則偏重美術。西班牙之天主教。則偏重神祕。若夫法國之天主教。則偏重於社會方面。Bossuet 公既解明教會云者。乃社會上之

連絡線。非特同世相連絡。而且隔世相連絡。非特同國之人相連絡。而且全世界之人亦相連絡。法國之天主教。非特欲構成國家中屬於精神上之團體。而且欲以此團體組織於全世界而構成一公共之天國也。由是觀之。則法國之天主教。其爲人類之心。更較勝於爲自國。不失其爲救世之本旨。此非所謂富於人道觀念之尊教者乎。

又試言法國之歷史。——法國之立國最早。故已早知已國在世界必占一大國之位置。中古一統時代。雖功業未十分完成。然國家之基礎已具。構成此一統之局。須經多次之爭戰而後可。法國昔時既曾得名之爲尙武國。因保守而戰爭。因擴張而戰爭。因均勢而戰爭。因帝權而戰爭。因傳播而戰爭。所應變各殊而所持之目的。則在乎維持己國之命運。欲維持己國之命運。則必維持歐洲各國平均之勢力。由此而法國自古至今。曾防禦各大國。不使之侵犯各小國之境土之獨立。以使之皆得保存歐洲中之地位。此政策則惟使各國之平權互相牽制。而國國各自由闡發其國粹。以與自己之命運相驅策。是以歐洲之天地中。凡何時有一崛起之國。或梟雄之主。欲以勢力宰制各國者。則法國必出而干涉之。試觀如昔時法國之與西班牙帝系及奧大利帝系相交戰。則可知矣。確知凡此各戰。法國亦不免有私利之見。然未嘗與歐洲公共之利益相反對也。是以凡法國戰勝之日。卽爲歐洲得享和平之日。此寔於歷史上確然可徵也。然非特法國能保存各國之自由獨立。而且又以財以力爲各國擔助。以恢復其自由獨立權。美之獨立也。意國之統一也。希臘之脫離土耳其也。皆法人贊助之力居多。法國之成就此事業者。以法國能調和各個權利。使與公衆不相衝突也。因是而法國能忘私利。能擔義務。能有尙公理重人道之資格。

耳。夫羣雄瓜分人各一席。法國豈終束手坐談博愛慈惠而甘仁自損其國威。且夫攻取屬地而迫使他族之人民爲已之奴隸。則其舉動寔出於非義。若夫保護人之土地而教育開導其人民。以預爲他日自由獨立之地。則其義之至仁之盡。孰有以加乎此。而此則正大法國所以對於各屬地之方針也。

總法國之歷史而觀之。自古來茲。法人只欵慕各個義務。而且能調和自己之與公衆文明之事業。方匈奴侵入歐洲之時期。斯時法國雖未完成。亦能抵禦斥退。使彼醜虜不至以野蠻之行動。蹂躪歐洲之文明。繼其後兩世紀回教舉兵來侵犯歐洲之南部。而法國亦能出征掃平於 Poitiers 平原地。以護持天主教。使不爲異端所肆毒。又近日德人捲地而來。至馬耳尼河岸。法國亦能奮力抵抗。以救護其國之運命。而且爲世界之人道公理護命。使不爲殘暴之條頓人種所踐踏跋扈。以自退於野蠻之位置。况又法國凡自己之事業。亦足以爲世界之影響。如一千七百八十九年之大革命。則其爲世界之主動力何如乎。吾儕試觀是年八月二十七日立憲會所發表之人權宣言書。所謂『凡人人皆得自由平等。』此宣言書之所謂人者。蓋謂全世界之人。而非獨一法蘭西之人也。由此大同之性格。而一千七百八十九年之革命事業。有絕大之勢力。而當日之人權宣言書。又爲世界上之福音經也。由是觀之。則法國歷史之性格。有關係於世界者不淺。而且與法國之文章之哲學之尊教皆具有人道之理想也。

總之人道者乃顯然之特性。即成其爲法國文明學術上之精神。吾儕今日欲模仿法國之學術者。則須深曉然於此等之精神。毋徒從文明表面之誤見解。而致有毫釐之差千里之謬也。

◎ 科學

○ 潛水艇

(續)

雪輝

丙 潛水艇在現辰各國之勢力

一千八九十九年。Goschen先生已宣言於英國下議院曰。『弱小國自衛之器械。莫良於潛艇。』一千九百七年。Bordeaux海軍製造局會議。Laubeuf先生之宣言亦曰。吾人類進化之程度。不甚發達。欲進化之速。當不務其攻擊力。而擴張其防禦力。此寔弭兵時代之第一階級也。據今日文明世界之現象。則弭兵之議。徒夢想中之一物耳。欲保護和平之定局。不可不使世界中各國皆具有自衛之能力。近來所發明之潛艇。已確有爲弱小國自衛極良器械之名譽。則凡第二等海軍諸國。宜早組織成一完備之潛艇隊。此誠吾人今日所馨香而戶祝之也。將來人類。弱者小者。皆具有自衛之能力。令彊者大者。不敢濫用其權力。世界得食和平之賜。潛艇業之創造家。寔預有功焉。夫使潛艇之効力。其結果能若是。則其價值之寶貴。可勝言哉。而孰知於事寔上適相反也。現今弱小諸國。猶未有足以自衛之潛艇數。而彊大諸國。如德人者。已逞其橫暴之野心。製成無數潛艇。爲阱於海中。陷溺幾多數無辜之商船。以阻世界交通之路焉。彼潛艇業之創造家。豈料其爲彊暴者所利用。以遂其侵蝕弱小之狡謀。一至此耶。噫。世界之不幸。亦甚矣。

丁 德國之潛艇

德國製造潛艇。蓋自千九百五年始。其後於法國者。殆七年云。

德國所製之潛艇。以『U』字爲號。旁編數目字。(U乃德文潛艇字(Unterseeboot)之減畫)。『U 1』號爲德國第一次出現之潛艇。於千九百五年八月三十日下水。製造式一仿法國千九百二年所製(Aigratte)號潛艇。長三十九尺一寸。闊三尺六寸。高二尺八寸。排水力在水面得一百八十五噸。在水底得二百四十噸。有二百馬力之煤油發動機二具。一百馬力之電氣發動機二具。速度在水面時每一點鐘十一海里。在水底時八海里。艇內置一放漁雷管及四十五生的之漁雷三具云。

『U 1』號潛艇。經試驗得有成效。至千九百六年。德海軍部增製三隻。『U 2』『U 3』『U 4』千九百七年。又增製四隻。『U 5』『U 6』『U 7』『U 8』

自千九百七年至千九百十五年。德國製造潛艇之經費。年有增加。觀下列之表可見。

年	經費	年	經費
一九〇七	六、二五〇、〇〇〇	一九一一	一八、七五〇、〇〇〇
一九〇八	九、七五〇、〇〇〇	一九一二	一八、七五〇、〇〇〇
一九〇九	一二、五〇〇、〇〇〇	一九一三	一二五、〇〇〇、〇〇〇
一九一〇	一八、七五〇、〇〇〇	一九一四	二二五、七五〇、〇〇〇

蓋自千九百六年之後。德人知潛艇於軍事上之關係甚巨。深慮己國製造潛艇之業瞠乎人後。遂不惜心力。以急起直追焉。自千九百八年。至千九百十一年。德國所製潛艇。已有二十四隻。『U 12』號以下。至『U 32』號。其製法比前已大進步。長六十五尺。闊六尺一寸。高三尺六寸。排水力在水面得六百五十噸。在水底得八百噸。速度在水面時每一點鐘十六海里。在水底時十海里。艇內置四放漁雷管。前後各二。及漁雷八具。入生的入大礮二尊。有九百五十馬力之煤油發動機二具。四百

馬力之電氣發動機二具云。

千九百十三年。又增製六隻。戰後所製之數。尙未知其詳。現千九百十四年。德國潛艇總數。合已成未成者。則共有三十八隻云。

德人製造潛艇之業。後於他國。其利害亦各參半焉。經他人屢次試驗。得最新之良式。專事模倣。而不勞創擬。此其利也。製造後於他人。艇數不及諸國之多。此其害也。開戰以來。德人軍事獲助於潛艇者不少。然其窮兇極惡。犯世界之大不韙。亦潛艇之助爲虐也。德人用潛艇狙擊敵國之戰船及商船。固極便利。無異掠人取財之盜。潛伏一處。以伺行人。出其不意。絃而奪之。爲勢誠易。然亦多有不測之危險。蓋潛艇之爲物。易於受傷。苟其外壳一爲彈所穿。即失其排水之力。不能潛水。敵人即可以漁雷艇捕之。或擊沉之。故潛艇常不敢與武裝之船艦交戰。每一商船各置數尊大礮。足以防禦潛艇而有餘。現英國商船。已建行此議。然商船太多。非得多數之大礮。多數之礮兵。不能一一裝置。夫以商船而置大礮。德人必藉口於國際公法。謂交戰時武裝商船亦與戰船同例。擊沉之不爲背法。然海上貿易之安全。爲公法之所保護。置一二大礮於商船。不過出於自衛之計。猶人行遠路。懷一手槍。以備彊暴。安得以戰船比例耶。

協約各國。欲禁制德人潛艇之行動。已立一偵察隊。輪巡各海面。以自一百噸至一千噸之漁雷艇組織成之。雖不能遍布羅網。然日日搜拿。處處驅逐。彼將試行其殘惡之手段。一遇偵察。便不得不覓路而走。盡棄所圖。兇焰亦爲之大殺。夫以茫茫之大海。於無聲無影中。而覓彼出鬼沒神之大怪物。常有彼伺伏我傍。而反不及覺。日夜梭巡。辨水面之微痕。以認海龍之行跡。我之弋彼者。不敢息。而彼爲我獲者。無幾時。偵察潛艇之事。其厭倦甚矣。然潛艇之生活。其苦更有倍蓰於是者。每一駛

行以十日十二日爲限。此幾日中。船員幾無一息之安。無一刻之暇。目不停瞬。注視鏡管。前瞻後顧。伺可攫之機會。或應避之危險焉。測候再四。果波平浪靜。無一疑點者。乃敢一出頭水面。吸取空氣。寔電於電機。預備一切。匆匆入水云。然猶有意外之驚惶。爲所不及料者。德^{U.S.}號潛艇長一軍官。曾將此中困難情形。述於一報館主筆之美人云。[~]潛艇中空氣溷濁。煤油硫酸之氣。蒸塞鼻孔。二十餘人。齧聚於一湫隘之暗房。呼出之炭氣。不勝其苦。精神困倦。奄奄欲睡。無片刻之運動。得以開暢沉鬱。食則乾餅乾肉。艇中之電火。留爲駛行之需。不敢濫用於烹煮。夜間亦不敢航行水面。恐巡洋之艦。無燈火可辨。偶一撞遇。不及潛避云。海水平靜之時。鏡管浮沒於水面。一望可辨。不得不覓處藏避。及夫風濤洶湧。艇身顛倒靡定。自救不暇。何暇擊人。狙擊他船。亦常勞而無功。四處尋覓。得一戰艦或一商船。航行相去稍遠。彼之速度加於我不等。盡力所及。以思一逞。而不覺過眼失之。且海中常有水雷。或爲己軍所設。或爲敵軍所設。無意觸之。便足隕命。耽耽逐逐。勞神苦形。如是者十餘日。及回本港。乃卒無一漁雷一礮彈之命中。寧不憤愧欲死者乎。[~]

職是之故。開戰以來。德人潛艇之自由行動也如是。各國商船。往來如織。賭性命於波濤。而無所恐怖也。如是。而爲所狙擊者。曾幾何哉。英國海軍部。每一星期。將海船出口入口之總數。及爲德人潛艇所擊沉者之船號。逐一佈告。無所隱諱。英人性質光明坦白。大率類是。觀所佈告。知德人潛艇之不足畏也。英國各海港船艦出入之數。共二百二十餘隻。千九百十五年二月間。計平均每二日受害者只有一隻。三月間每日一隻。四月間已減其數。此數并沿岸漁船及中立國之商船亦在其內。然則德人欲以潛艇寔行海上之暗殺事業。殆無可達之希望云。

雖德人施此海賊手段。海上之交通。不無少阻。世界之生命財產。不無少蒙其損害。然從來商務之

利害。其關係於戰事者固甚微。以英國之船艦。而爲所擊沉者僅三五隻。曾不足損其毫末。而德人以此自絕於世界。其所失不已多乎。艦隊困於港中不得出。而一切海軍任務。乃盡委於區區之潛艇。不知潛艇縱有如何猛力。不過海軍中之一小部份。安足以代各大戰艦完固之鐵甲。精銳之武裝。現協約國鎖海之策已告成功。德人戰艦商船。已無馳驟海場之一日。而妄欲以潛艇戰略。爭海權之勝利。能乎不能。噫亦多見其不知量也。





◎ 哲學

世界進步之問題

(續)

▲ 品的文明與量的文明之比例

第四章

品的文明與量的文明。二者不可得而兼。此其一證也。其他不一而足。環予之身。無在非品與量之競爭界。而此競爭力。乃即爲今日文明之主動力。果也。吾人時代。僅爲新舊兩世界之競爭場。而此互有競爭之兩世界。非一般人所妄想之歐洲與美洲。寔品的世界與量的世界也。歐洲美洲亦均在此競爭之旋渦內。吾人所以久不能解決進步之問題。一以爲世界進步。一以爲世界退步。相反之兩觀念。常來往於吾人心腦中者。亦此競爭力之現象使然也。吾人時代。世界上所有一切事物。量常增而品常減。故就量的一方面觀察。則世界之進步多矣。而就品的一方面觀察。則其退步亦多矣。予不知何者爲解決此問題之方針。予常誤認品的與量的之兩比例。有時以品的爲吾人之需要物。更有時以量的爲吾人之需要物。試合一建築專門家與一鐵造磚造之築室匠。共談今日之世界。專門家必曰。今日以苟且粗略之建築法造成無數之城市。無數之鄉邑。爲世界退化之兆。蓋今日之世界。已萬不能造一中古時代著名之建築物。鐵造磚造之築室匠。亦必以極果決之熱誠。反折之曰。進步之速。無如吾人時代者。新立之都市。遍地而有。舊都市亦處處增廣。有非常迅速之觀。專門家之言。則從品的方面觀察。以爲巴黎之大教堂。其價值猶勝於美國之全一大都。

市其言固自有理。反折者之言。則從量的方面觀察。亦未嘗無理。今而後凡世界上所有一切事物。每一研究其是非利害。就中均含有此一種可悲可憫之狂愚意識。予於美洲得一確然可據之明證。予赴美辰。銀行鐵路保險營業同盟會之反動力風潮。發生於數年前。而此辰方大劇烈。彼等修報演說。著各種有憑證之書籍。嗚訴諸大富商之罪惡。謂其敗壞社會風俗。寔行一新壓制主義。比之封建階級之束縛。王侯貴族之陵虐。更有甚焉。借營業同盟之名詞。使用其暗昧壓制之主義。以奪良善平民之工庸。此反動力風潮。澎漲於中流以下之社會。而其力之偉大。在於傾倒共和黨。然一般之大經濟家。在美洲人。亦如在歐洲人。立於此衆怒沸騰萬矢一的之對壘。屹然曾不少爲動。反笑反對黨。甘自退步於文明之前途。欲恢復中古時代之蠻劣思想。雷同附和。百口贊成。現時經濟法之完善。謂其經營宏遠。組織精密。獲利甚豐云。夫以最關重之一問題。當此民智大開學界昌明之時代。而世人之對於此問題。其意見紛歧乃若是。則何也。意者今日世界。惟一般人有明見事物之特權。其他之一般人。則都得不治之盲疾耶。非也。無盲者。亦無明者。惟同一物也。而研究之者。判斷之者。懷挾有兩種之要求。乃各以其所懷挾者。爲研究此物判斷此物之比例。如是而欲其同意。烏乎能。苟以量的爲觀察事物之比例。苟以增殖人類之生產力爲吾人究竟之目的。則經濟自由之說誠是也。雖其中有發生種種不公不平爲人類弊害之罪惡。如反對黨所嗚訴者。亦不過經濟上之小庇耳。其寔世界得以日臻富盛。人類得以增享幸福。非經濟自由之功而何。然以全世人之利害。總受制於一不知不覺之經濟自由力。此等思想。揆之吾人文明鼻祖之古時文明。殆溢乎其外者。彼於經濟自由力之運動。常以仁義爲界。劃定其範圍。縱令世界上工商業之發達。受其阻力。亦所不惜。即如放金出息之禁。其一端也。彼非不屑經濟。然以經濟之發達。當限於絕品倫理之

範圍中。蓋以量爲品之附庸也。故吾人今日苟以品的比例觀察現時之世界。則反對經濟自由之說亦誠是也。今日之經濟家鑽營百計。甚至以賄賂爲生財之門徑。雖得利誠厚。然凡稍有高尚之良心者。對於此手段。亦固以低劣視之。一般人服從經濟自由主義。與一般人反對。各持一說。亦皆能長立於不敗之地。彼此之兩方面。均未有決勝之把握也。

職是之故。欲品評歐洲美洲之新舊兩世界。一一比較其優劣。亦無了期。比較之缺點。即品的與量的之兩比例。不分明也。美洲決非一怪物之世界。其人只知以金錢爲目的者。亦決非一傳奇之世界。一切事物。爲古今東西所未曾有。如一般過譽美洲人所常稱羨者。寔乃百五十五年來量的原理之發生物過猛之一世界也。當墾荒殖產新利器之汽機發明時代。有一勤敏強健之民族。占得一浩大之領土。田野既沃。林礦復饒。四顧一茫茫新開闢之大陸。無束縛習慣之一切舊基礎。如有歷史上之一新大路在其目前。放步直往。縱其馳驟。而莫之或遏。纔百年間。而生齒之繁聚。都市之設立。凡人類所需求所愛戀所歆羨之產物。日以加多。其進額殆十倍十五倍。至於三四十倍。爲古今所未曾有。遂於不知不覺中。猛然造成一光怪陸離之社會。直以舊時之品的思想。奴隸於量的新思想焉。美洲於智識上之高尚事業。非不歆慕。然其用力於美術哲學。亦不能與彼之最高目的的相反。彼之最高目的者何。則以極便捷之機器。開闢一速成之新世界是也。謂歐洲爲文明之花。對於美洲之野蠻。相形見美。抑謂舊世界之文明。已成一老腐之物。奄奄待盡。不可復活。皆妄也。歐洲亦已駸駸乎入歷史上之量的時代。在歐洲人。亦如在美洲人。衣食亦欲其豐美。宮室器用。亦欲其光潔。公私經費。亦愈日愈增。則亦不得不亟需於生產額之增進。然此項事業。歐洲較美洲爲難。歐洲人數多於美洲。一大部份之地力已竭。洲中又析爲各國區域。各種音話。於營業上蒙其阻害。

者不少。且以世界最古之洲。昔時之流風餘韻。猶有存者。品的文明之傳播力。猶猛。屬於智識上之高尙事業。則歐洲勝於美洲。而經濟上之發達。則歐洲不及美洲遠甚。然則以品的之一比例。或以量的一比例。品評此兩世界。則彼此亦互有優劣。蓋以生產額愈增進。爲文明愈發達之影響。則美洲誠世界。界上文明極點之模型。反是謂文明之高下。只以智識上之高尙事業定之。則歐洲又占文明先席。

第五章

難之者曰。天下無不可解決之問題。此兩比例當以何爲標準。世界今日之景象。爲進步之一英雄歌。抑衰亡之一悲慘劇也。歐洲與美洲之新舊兩世界。果孰優而孰劣也。文明極點之模型。於二者將何擇焉。豈有設此等問題。而更如是紛糾莫決。既不能決。而游歷美洲勞費時日。何爲者。縱有是行。亦當注意於他項。而何必展轉於此問題。及其歸也。又何必有屬於此問題之著作。如此相難。予固無以自解。然吾人尙在現時文明之圈套中。則此問題猶豫不決之困難境。總未能脫離者。此未能脫離之困難境。蓋卽吾人征服世界與美洲大發達之代價也。欲具征服世界之能力。吸收一切地面之寶藏。則不得不犧牲其吾人所固有數千年祖尊遺傳之美術。道德。尊教等絕品理想。然謂此等絕品理想。一切捐棄可乎。謂吾人心目中有一純粹量的無美術。無道德之世界可乎。設此問題。正以解決此問題也。顧當此征服世界之猛潮。人類之驕貪心。殆臻極點。今日世界。決將達到其最終之目的地。現時恐無論何等尊教。何等倫理。何等政治。總不能舉人類一切社會立一防奢制慾之範圍。且世界上之人數。之人類需要物。之公私經費。愈日愈增。則量的勢力。澎漲殆遍於全地。

球面上。機器之製造。欲其益靈捷也。林野欲其多墾闢也。礦產欲其多採掘也。此等希望之熱力。吾人之美術倫理。猶不得不屈從於其下。生產力之增進額。愈日愈為進步程度之衡尺。大領土。大帝國。富於煤礦鐵鑛之民族。愈日愈占時勢之優先權。火神復為世界主宰。如人類始有歷史之時期。吾人心腦中此問題猶豫不決之困難境。殆未知其所終極。無一哲學無一科學有特別之勢力。能發生吾人對於此美與醜善與惡真與偽之分明觀念。以解決此困難問題。凡一切事物之優劣點。淆亂於吾人之心腦中。世界之進步與否。吾人不能解釋分明。亦猶節之與奢。當然之與太過。吾人之審美觀念。年有更換。昔以爲美也。而今乃以爲醜。今以爲醜也。而後復以爲美。且一切事物之玄奧。爲我祖尊數千年前所俯首不敢一過問者。吾人皆將窮鉤而遠索之。試問吾人此極等優勝之科學。眞耶僞耶。果予吾人以觀察事物真相之慧力。抑僅眩吾人以一般幻象耶。今日世界之現象。其趨勢極猛。常溢乎範圍之外。環吾人之身。震撼一切。卽現時之世界。恐未必其非幻境也。

第六章

或又曰。苟此問題萬不能解決。則注意於此何爲者。啻如人有不治之病。則漠然置之。不以爲意。不猶愈乎。予以爲節吾人有用辰刻。以披露此歷史上未曾有之一奇現象。固非徒勞者。且於代表品的世界之舊國家舊民族。於法律家尊教家文學家獲益當亦不鮮。今日社會除醫學務療疾之神效。科學務工藝之發明。遊戲美術家務供給公衆之賞玩。其餘智識上事業之經營。皆若迷其方嚮者。試問一誠寔尊教家。遇灰心喪志之種種激刺。寧不撫心自悔。曰。當人類貪慾心臻於極點。舉世若狂之時代。而欲以基督之道德教人。庸何益。試問一大歷史家。寧無撫心自悔之日。曰。當人類之。

希望。注於將來。合眼向前。而無所忌憚。如此其劇烈之時代。而猶擲血汗於螢窗之歲月。區區蒐集古時之人物事蹟。以餉厭古蔑舊之社會。胡爲者。試問一大哲學家。見世人心理。大都傾向於經濟上之切寔思想。寧不自詫爲初墜地球之一別行星上人物。又試問一高尚之美術家。其目的不專在於金錢。而在於絕品模範的美術。寧不長吁短嘆。浩然太息於此泄泄沓沓之世界也乎。固知一般人亦時有復古思想。于商賈輻輳。汽笛如雷電。線如織之間。突然有留意於尊教之改良者。於古書之蒐集者。於倫理之前途者。於純理學之問題者。於刲灰後之文明遺跡者。然不過一時興適。無完全鞏固之力。能使美術家文學家有一分明解釋之觀念曰。我果於進步社會中占一重要之任務。一高貴之價值也。職是之故。今日智識上之營業。或以攫取金錢。或以博公衆信用。皆有其他之目的。而於智識上曾無所謂目的者。以一古史學家游歷全美。行經無數寥寂之曠野。汽車沿路日見青青極目之小麥咖啡。轉念古時希臘石上所雕刻所磨礪之片片細花石。何等精巧。今日陳設於各古物館。猶令人感服不置。觸想所及。殆不知其幾千遍也。夫希臘人所以有此絕品美術。非曾強制其征服地球吸收財產之野心也耶。而吾人時代。所以能藉汽車之力。占有大沃野大礦山。非甘心捐棄其所固有數千年祖尊遺傳之絕品倫理絕品美術也耶。觸想如是。古史學家於昔時文明與現代文明。見之較確。古時文明。過注於品的之希望。乃至畢生精力。爲一至狹至高之目的。所驅策。不幾於銷磨殆盡乎。而現代文明。迷醉於量的之酒精。又不將陷入殘暴粗鄙之野蠻域。汨沒而忘返乎。欲人類得共享文明幸福。則非於品與量之二者劑其平不能。而欲劑二者之平。則非古時絕品理想之倫理之尊教之美術。猶具有特別勢力。可坊禁人類驕侈之貪慾心。不爲功也。噫安得汽輪電管風馳雨驟。聳動世界之暴厲聲中。猶聞有悠悠藹藹譜維耳支勒 (Virginia) 詩之琴音也哉。

● 文苑

石農詩集

九日病起弔潘安戰場

南瘴何處是。江河相表裏。窮秋况苦雨。滿地皆白水。今日是何日。東窗皓日出。重陽古所名。樂此沉疴失支筇。臨墻墀乘興肆所之。不見黃花開。空吟黃花詩。高歌望白雲。正與秋興宜。雲邊何渺然。陰風來江天。僕夫爲余泣。戰場悲舊年。閩臣激兵變。重城動戈鋌。征樓起四野。戰鼓哀前川。壯士血戰死。健卒黃沙眠。至今煩冤魂。化爲嵐與烟。官軍破孤墉。乃在乙未冬。層雲駕飛梯。檻車俘元凶。邊將亦何知。皇仁宥脅從。人烟千萬家。枕骸何重重。碧血變田草。荒廬悲野虫。鬼哭不知歸。淒風原上松。左將昔開藩。少小從戎軒。親見全盛日。人物何囂喧。重江集烟火。五鎮通舟轆。樓臺夜夜月。歌舞不閉門。中年遭兵火。荆棘竄戰魂。饑餓且偷生。行邊復西屯。白頭十年歸。門戶無復存。町疃改行迹。狐狸鳴頽垣。新鄰正蕭條。舊鄰更何言。疵癘遭天行。螻蟻非所論。撫膺望曠野。纍纍青草原。草木多於人。况乃陰氣繁。天道否已傾。九重方偃兵。昨日烏東道。三軍還凱聲。軍中吾老矣。論功欲何成。故里有荒田。願率妻子耕。廟謨調風雨。日醉歌太平。回首一生事。豈不幸遺生。言盡泪沾裳。令我心骨傷。漢皇昔中興。英豪生南陽。九原不可作。江水空泱泱。卽事且如醉。感昔徒斷腸。北風驅南雁。盡日沙塵揚。客愁不如歸。胡爲天一方。念此未可得。陶然東籬觴。

月下烹茶採盆菊

南海無寒歲。何能欺冬花。燁燁黃金友。日醉彭澤家。相對樂晨夕。坐命花間茶。披襟覓流香。清影橫

窗紗。仰見月明光。滿地成冰池。月光不自媚。獨有黃花知。綽約花下影。玉人來何遲。對月掇其英。泛之龍團卮。舉卮吸明月。中見好花枝。幽賞喜有托。清意兩不疑。傾倒流霞漿。香風裊裊吹。如何甘谷飲。迺與湘客宜。良宵不易得。花心良自持。歲晏孰華予。及爾懷芳姿。

憶舊遊。寄阮恕齋。兼問潘文表。

江上逢人何所寄。題詩聊當一枝梅。剩憐東浦三秋月。曾到離人昨夜杯。流水聲中雙釣棹。垂楊陰畔一糟臺。問君暇日逃禪地。潘令桃花開未開。

順城覽古

延峽峯前朗水瀆。江山遺跡不堪聞。蘭公劍甲歸仙井。占主樓臺見暮雲。幾處人烟臨灌莽。十年歸戌事耕耘。茫茫今古無窮意。隔浦漁歌晚獨醺。

遊鵝嶺作

秋日明萬象。秋山騁華姿。藹藹含和澤。而無搖落悲。天靜林逾碧。雨過晴亦宜。因之寄遠興。夙心淹已彌。今日此暇日。振策凌崇陂。鳴鳥高下迎。逸兔東西隨。當塗臥古木。我馬不得馳。下馬舍而徒步。行荆榛。披俯跨幽崖石。仰攀枯藤枝。置身絕巔上。遂與萬化遺。天地信寥廓。心目兩不疑。豹山挾右肘。松山支左頤。逶迤阿鼈山。導我張雲旗。天女浴螺髻。盈盈明月規。遠海眷言涉。半天劃琉璃。牙山有仙井。蓮山有清池。歎息獨不見。雲外生夢思。山人指山陰。此間有黃芝。江上含淳氣。乃獨鍾毓之。服食駐童顏。功在殲三尸。峨峨稚川子。千載豈吾欺。仙鄉不可望。願言掇芳蕤。仙家有至味。良爲達者貽。來徑自此熟。命駕應無期。

九日

重門深鎖宿雲遮。一帶清江繞郭斜。若去登高傷舊別。重來沽酒叩誰家。漁帆遠影明殘雨。樓鼓寒聲隱暮鴉。莫怪白衣人不見。秋山何處對黃花。

哀哉窮士吟一章哭阮師旦

哀哉窮士吟。惜哉龍珠子。獨抱耿亮節。豈伊生死異。貞松無寒歲。良樸有晚器。大運苟匪且。之子良不愧。姱修誰所知。孤芳固自媚。植性溫以直。飭躬仁與義。潛厥詩書腴。濟彼風雲志。奇服妙年好。明德皓首冀。眷言求先鳴。與我成連理。北闕方振步。南海倏垂翅。一鶚何超忽。千里自迤邐。可汲井勿幕。有道穀寧恥。且自勤龍阿。日以劙棘杞。但恐昧初服。豈患染瘴膩虛舟。非怒人美服。慮見毀。遂令溝中斷空遺。大廈庇桐焦。豈無聲。金柔不繞指。正賴固窮節。不患行無位。敬通思躬耕。仲翔行荒徙。臣罪固當誅。聖恩未見棄。大哉覆物天。幸有補過地。際會奉新寵。追惟師前軌。璃魄空自明。劍心不知死。君恩難言酬。親心詎以慰。恥未三事能。悲徒一名恃。竟使絕筆書化爲千行淚。一心千萬言。一紙千萬里。故鄉何由達。旅殯誰歸此。憶昨同荒餐。惠我聯遊轡。喧晨窺海濤。虛夕挹山翠。烟雲生壯懷。澗壑飽幽耳。歸來飲美酒。談笑吐奇氣。古訓日與析。周行每見示。懸齷決昔壅。神藥服新喜。誰言金石姿。忽爲芝蘭悴。賈生才未老。子來天奚以。命塞詫懷信。道泰感獨否。毋乃韞瑜瑾。猶能騎箕尾。渺渺三峒沙。湛湛三潘水。蕙綢多水怪。荔服半山鬼。瑤團青虬驂。芳洲石蘭被。大荒飄然下。芳馨尙我遺。

遊石峒山乘月泛麻文海門夜還村中作

山路臨大江。山石相枕籍。來徑不必熟。幽興良已迫。乘馬緣巉巖。鞭水及其幘。行行忽回首。石屋見

虛白。霞光漏一線。秀色交翕闢。窈窈數武間。覩之可容席。舍馬步而入。有如蟻緣隙。仰攀枯木枝。俯踏鉤藤刺。絕頂非易凌。冥搜固未射。僵僵路彌狹。但隨鳥行迹。蝙蝠近却飛。飄然罩兩腋。童僕相嘯呼。奔騰墮岩石。側身越危磴。不知坐幾易。卽事多新奇。豈待窮幽蹟。亭亭冠壁雲。涓涓圍沙汐。垂足盤石上。遠海湧深碧。拂石待明月。散髮弄新縞。久生生深愛。依依不肯釋。載山如可去。扁舟誰見惜。漁翁月中來。傍舟向江磧。邀我揚清謳。烟波互驅役。棹發岩壑動。舟行蛟鼉辟。谷風乘其虛。簸揚數千尺。屢覺臥枕偏。遂令舞地窄。挂席過斷橋。發笱就平澤。天星微微明。漁火稍稍積。衣露恐已霑。歸詠還自適。萬象傳檄定。不復暇揮斥。却顧舊來山。幾爲江水獲。步月叩里門。鷄犬靜阡陌。主人知我還。炳燭候中宅。山茗不必味。親自捧芳液。須臾羅酒漿。滿案致肴核。苦辭野味薄。但願永今夕。愧此父老情。一醉非所惜。斯遊若可再。幸及刈新麥。世外吾未能。柰此水石癖。

遊疊石山題石

石室有老人。不知其姓字。自言八十餘。未嘗至城市。如何深山中。有此半間屋。滔滔名利者。未可借信宿。一洞復一洞。吾行屈以曲。愛之欲高臥。携席就空谷。谷口如斗大。緣石出其隙。何處大海中。春濤一線白。題詩遍岳石。留與山翁笑。莫問後來誰。庶以從吾好。

園中春曉

日出城東隅。方知夜來雨。草木榮春和。相對自成趣。采采芝蘭叢。青青獨柳樹。黃鳥復婉轉。見我再三顧。和澤眞無私。幽居久自悟。解顏命童僕。願言學爲圃。嘉蔬但灌溉。庶以樂旦暮。嗟予塵網中。鬱鬱獨何慕。藿食雖無謀。覽物欣所遇。當窗淪朝茗。曠懷觀天宇。陰風東北來。浮雲忽復聚。佳日詎有幾。冥心獨自喻。披衣將何之。烟草滿中路。

● 雜俎

▲ 德人改建共和國之運動 錄中華新報

大陸報載哈林吞氏一文 記在紐約之德人 關於改建德意志共和國之運動

甚詳亟譯之以饗讀者

在此紐約一隅

現有一種關於創建一德意志共和國之運動 在進行大有一瀉千里之勢 此種奇偉事業在紐約

本非創見距華爾街不遠從前恆有贊助其他共和國之會議及運動終能達其目的蓋自由之炬騰其光輝於此等海濱固已不止一次矣 距今

約七十五年前有許多德人避地來美 蓋當時自由運動彌蔓全歐卒爲武力主義之威權所壓服此等思想自由之

德人不得不去祖國而亡命於新大陸然其醉心自由始終不怠今日爲新共和國運動之人蓋即此輩之子若孫也 現在

紐約此項團體名曰『德意志共和國之友』其機關部設於合衆街三十二號門牌規模縱小但已準備遷入較大之新居其主仁

並幹事長爲科脫勒氏文牘科長爲般特夫人及科希比亞大學般特講師之細君同爲女子參政派人首領會計科長布恩博士則

經濟學家也余嘗至該機關部得部中許可檢閱全國各處對於斯舉表示同情之來函由此等函札觀之可見此項運動大有風起雲湧蔓延於全美

各地之勢今更述科脫勒氏之歷史 彼父母爲德人但彼在倫敦多年爲柏林社會黨機關佛華慈挾之倫敦通信員並爲法國瑞士各報

之英國代表形貌雖屬條頓族人然曾入英國籍平日議論素不效忠于凱塞彼爲社會黨人而在紐約之德國社會黨人不甚喜之且當地條頓人

報紙恆排斥之言外之意似謂彼係受僱於英國陸軍部科氏對於此等責詞一概否認自言一九一四年八月某日（按即歐戰開始之後）因在

倫敦無計餬口遂航海來美著書賣文爲活直至近來被人公推爲（德意志共和國之友）之該仁兩月以來忙碌異常竟爲紐約最忙

之人之一科氏之言曰（余當有所辦白以免外間誤會余雖在英倫入藉然余之思想感情仍屬德國式前此二十年以來余曾屢歸祖國余

之入英籍大半爲社會的理由耳余雖爲社會黨人與余同事之人亦有列名社會黨籍者然

的運動 在德國之社會黨人與他國相同派別不一但與吾共事之人 大都主張共和主義或民治主義德意志共和國之友抱

一種信心以爲欲挽回此次可驚之戰爭其最妥最捷之法厥惟設置一德意志共和國德國人民早一日推翻彼等之專制貴族官僚卽早一日可得和平俄維斯人已指示吾人以途徑矣余確信若使意志共和國一經設立美國卽不能於正義上繼續對德作戰美總統威爾遜君宣言書中分別德國人民與德帝國政府不混作一讀目下德人已深喻此旨德共和國一經成立若法蘭西共和國與立憲之英政府仍對之而作戰殆無此理蓋今之戰事本爲自由及民治主義而奮鬥也德國目下係封建主義之一種殘物國內之人可大別爲二派一派爲主張全德國主義者其中包括有財有勢之實業家及大地主在軍人一階級中最占勢力者卽爲舊時地主之子孫是故成就一種專制制度凱塞爲其後盾而在別所執持之時卽霍京索倫朝之末日至矣（德意志者我國之友）近曾刊布一種徵告文宣布彼等之尊旨科氏持以相示中有一節云（德國人民對於移去目下執政之人物有切慮之關係倘此次戰爭德國竟獲勝利寔爲德國人民之朝禍此後彼等之受屈辱與痛苦將舉全世界之人民莫與倫比也蓋野蠻殘酷之武人黨若一戰而曉氣燄愈高地位愈固擁有青年無智識之一部大軍隊得無數官僚之贊助而人民大戰之後壯者多死於戰場元氣凋殘祇有俯首帖耳匍匐于專制桎梏之下耳近來在德國憲政改良之說甚盛彼其國之執政界人每自覺陷於窮蹙之地卽照例提出此等說詞以飭人民此固彼等之慣技也德之貴族向來霸佔普魯士選舉權藉以控制全國又把持陸海軍藉以控制皇帝此等權利彼等豈肯輕易拋棄政治社會經濟各方面貴族無不處於優越地位欲彼等讓棄此等特權豈有不猛烈奮鬥者哉而奮鬥之武器彼等祇知一物卽暴力是已彼等心目中祇有階級制度不但秘藏於心且公言於口蓋彼等明知階級制度一變卽彼等之萬事皆去也德國人民雖受桎梏固具一種堅固之民治精神此精神確能見諸行爲從前已有明證此乃握政者所深知而深防之者也科脫勒氏又言關於自由之運動業已在德國境內從事進行運動主要機關之一係一種四頁之小冊名曰《真言》在瑞士印刷大批潛入德境此印刷物之面積祇長八寸闊六寸然德人對於帝國現狀之思想已於此小冊內闡發無遺矣又曰除《真言》之外尚有種種運動文字在國內散布或秘密輸送或用飛機由空中抛落此等活動之結果必能漸漸崩摧階級制度之堅壘也據旅行德國之人言共和運動蔓延甚迅聞有男子婦女因散布小冊而被捕者在東方戰

地之德兵數十萬人與俄之革軍接觸互相交換意見

故吾人有種種理由可信德之軍隊與平民終有一日揭反抗專制當

局之旗祇須事機成熟且知在美國有一種彊國運動爲彼等之後盾而環德之各國亦事事在促自由之降臨則彼等蹶然起矣是故在美國之美籍德人之態度與此事大有關係有一般人對於美籍德人輒妄相疑忌毀其信用致此等德人本天然表同情於美人者轉而隱然予助力於凱塞及德之貴族此則須彼輩之覺悟也吾謂美籍德人應一念自身之來歷須知當一千八百四十八年革命失敗之後德國優秀子孫被驅來美者數千人當俾斯麥秉政時凡男子婦女懷社會黨思想者俾氏輒以匪類視之其時因在政治上社會上經濟上不容於祖國遁而至美者又數百萬人今之在美德人皆此輩之子孫昆弟耳故德意志共和國之產生羣籍德人必竭誠歡迎之盡力贊助之今（德意志共和國之友）之目的即在設法團結美籍德人組織彼等之勢力以之贊助祖國之共和分子俾得達共同之目的也（德意志共和國之友）之運動直至今年五月下旬始行發軔然發起人所接熱誠贊助之請願甚多一八四八年之先覺與彼等之子弟及各項行業之男子婦女皆來書自認贊助（德意志共和國之友）極願以此等愛自由之德產人民之名義對國內德人而發言必將竭其所能以匡助在祖國之共和運動必效法俄國之同樣團體以彼等所造福於俄之自由者造福於吾德之自由且將刊布小冊及一種定期印刷物并時行公衆集會以喚起在美德人之注意吾人將於數星期內在美刊行一種雜誌每月一回名曰（德意志共和國）在一時期內之經費已經募集此後捐款可望續續不竭此雜誌將以英文撰刊因美籍之德人如有至此時而尙未學習英語者必固執不化即以德語勸導之亦必無益也但亦有心理上天然不能學英語者則必居少數耳總之吾人此舉之有成大事特因逃霍亨索倫朝之壓制而來美洲之德人及其子若孫之匡助吾人德人束縛於專制之下已歷數世若能脫此羈勒將人人努力以赴之自大戰開始以來世界之情形即爲吾人所挹計畫之正當理由而德之當局且以潛艇之終得勝利欺罔吾民然吾人受欺過久今已洞燭事情之真相矣此項運動現在美國各大都會逐漸傳布其勢力已有根據之大城鎮不下二三十處亦可見其進行之一斑已

中華前總統黎元洪之近况

黎宋卿總統。經此番政潮激刺決計不聞國事。原擬俟河間正式就職。移交事竣。即游歷歐美。採厭世主義。昨十號據黃陂私邸。最親信人某甲回鄂所言。黃陂出洋之請確已打銷。經某策士一言提醒。謂公如出洋。則國政重負。仍未盡釋。且難免某派不造作謠言。疑爲謀政治上之活動也。黃陂深諳其說。故改變方針。決定攜眷回鄂。以全副精神。提倡寔業。先行試辦兩種。一將保安門外長虹橋一帶私置地產三十餘畝。開辦農產種植場。一將舊撫署(原擬改建黃陂別墅)。創辦女工織業廠。並自行捐款。將抱冰堂大加脩葺。寄跡其間。俾得優遊林下。以享餘年。業已指派危謹齋郭徵祥二人。回省籌備。然據最後消息。則黎氏已赴津。駐私邸。閉門謝客。不預聞世事云。

夫黎氏一生忠厚。迫於政爭時代。決然棄大位如脫屣。觀其辭職通告一道長電。淋漓悲切。黎之心事。大概可見矣。電文如左。

(上畧)頃聞道路流言。頗有於總統復職之說。竊加揣擬者。驚駭何極。元洪引去辭職。早有成言。皎日懸盟。長河表誓。此次因故去職。付託有人。按法既無復位之文。揆情豈有還轅之理。伏念元洪夙闕裁成。叨逢際會。求治太急。而躡於康莊。用人過寃。而落於輿凡。追思罪戾。每疚神明。國會內閣。立國兼資制憲之難。集思尤貴。當稷下高談之日。正沙中忿語之時。縱彈慮以求平。尙戎機而卽發。而元洪揚湯弭沸。膠柱調財。旣無疏濬之方。竟激橫流之禍。一也。解散國會。政出非常。謂法無明條。綺有先例。然而謹守繩墨。昭誓山河。顧以懼國民之中殤。竟至負初心而改選。枯蘆縮水。莫遂微忱。寡草隨風。卒隳持操。二也。張勲久畜野心。自爲盟主。因以國家多故。曲予優容。遂乘瑕隙。以激羣藩。結要津。徼明令。元洪雖持異議。卒惑羣言。旣爲城下之盟。復又奪門之變。莽蜂螺指引虎麋軀。三也。大盜移國。都已震驚。撤羽衛於東堂。屯重兵於北闕。元洪久經駭浪。何畏猶飄。顧憂大廈之焚。欲擇長城之寄。含垢忍辱。貯痛含辛。進不能登臺授仗。以殄兇渠。退不能闔室自焚。以殉民國。縱中興之有託。

猶判省而滋慚。四也。輕騎宵征。僻居醫院。暫脫身於寒庫。欲奮翼於渥池。乃者閩人不通。僨騎交錯。身藏使館。得避危幾。自承複壁之藏。轉凜堅冰之懼。亦旣宣言公使。早作平民。維於國似無錙黍之傷。而此身究受羽毛之庇。五也。凡此愆尤。皆難解免。一人叢謗。萬姓流離。覩鋒鏑而動傷兵。聞鼓鼙而慚宿將。合六州而莫鑄。投四裔以何遲。萬一矜其本心。還我初服。惟有杜門思過。掃地焚香。磨濯餘生。懺除夙孽。甯有辭條之葉。仍返林柯。墮溷之花。再登茵席。心肝尚在。面目何施。且夫謀國必忠。愛民以德。琴弛則弦改。車覆則軌遷。若必使負疚之身。仍尸高位。騰嘲稗海。播笑環球。將何以整頓紀綱。折衝樽俎。稀瓜不堪四摘。僵柳不可三搖。亡國敗軍。又焉用此。抑元洪尚有進者。國定斷一師。克在和。當興亡繼絕之交。爲排難解紛之計。正宜恪守法紀。捐棄猜嫌。况馮總統江淮坐鎮。夙得軍心。段總理鐘鑊不驚。再安國本。果能舉右絜左。提之寔寧。復有南彊北勝之疑。至施從前兵諫。各省風從。雖言愛國之誠。究有潰防之慮。此次興師討賊。心迹孔昭。何忍執越身之微瑕。措回天之偉績。兩年護國。岳表齊功。公忠旣已同孚。法治尤當共勉。若復挈短衡長。黨同伐異。員嶠可到。而使之反贊。宣房欲成。而爲之決水。茫茫滲黷。豈有寧期。鼎革以還。政爭迭起。凡茲兄弟鬭牆之事。皆爲奸雄竊國之資。倘諸夏之偕亡。詎一成事能藉。殷鑒不遠。天命誰堪。此尤元洪待罪之軀。所爲垂涕而道者也。勉哉河間。奠我民國。慚魂雖化。枯骨猶生。否則荒山越翳。縱薰穴以無歸。穹海田橫。當投荒而不返。悃誠感聽。維以告哀。元洪叩。

● 法國美術家之愛國


巴黎特信云。法國近今美術家組織特別會議。由雕刻家著名泰斗羅坦翁發起。招寫生妙手六十

一人結爲團體。名之曰巴黎同胞美術團。各出奇驚翻新之造品。發售於市。立志救恤祖國之傷疾。兵員。且以轉賄戰士之遺族。除精製斯等售品以外。並繪有巧麗異常之畫頁。訂成巨帙。顏曰國民戰爭畫頁。其內容悉屬近今德軍激戰之寫眞也。砲火驚空。萬馬驟怒。陣雲慘澹。碧血淋漓。其軍士奮鬥陷堅之勇貌。勃勃欲生。其營壘斜陽落月之淒悲。歷歷如見。亦擬乘時刊鬻。以供救濟報國戰士之資。聞僅刊二百部。卽將原板毀棄。用防一般出版營業者競爭刷印之媒。而保存此次發售之善價焉。至於所雕刻之新品。均屬關係戰爭。激勵國民破敵者。鉤心鬥角。鬼斧神工。或製成模範軍人偉像。或刻爲愛國志士豐姿。或摹仿怪傑德皇鬚眉。以動國民敵愾之氣。或巧鑄古代神女玉貌。以慰戰員效命之心。據該團員所談。余等鑒於戰士衛國忠誠。僅竭吾輩心勇力才力。以獎勵國民之勇氣而已。

▲俄娘子軍

俄國組織娘子軍事。日有進步婦人署名從軍者。已達八百人。陸軍總長克倫司基之夫人與焉。大俄婦女會會長薩辯羅夫。極以此計爲然。謂其增長前敵將士之踴躍不少。首倡此議者爲卜加羅夫夫人。以勇著名。曾受勳章之賞。擬以往昔斯巴達婦人之道。訓練俄娘子軍。凡稍違軍律者。斬不宥。因有阻礙。憤而辭職。離京往前敵助戰。現俄娘子軍擬以志願軍紀組織成軍云。按俄國女子軍聯合會。前曾通告全國婦女云。全國婦女鑒其以俄國之自由及幸福爲重者。望從速入敢死隊。加入軍中。勿惜生命。與敵軍力戰。吾輩所組織之敢死隊。係已奉陸部批准者。凡願入隊者。年在十六歲以上者。方爲合格。入伍之前。預攜其身照。或他項證明書。始准收入。再由醫士檢驗其體格。令其

知悉隊中之規矩。俟練成後。再向國家宣誓。以上各條。全應遵守。又如彼此致敬。乃爲尊敬體制而設。不可廢棄。凡陸軍部所委之長官。須受過中等以上之教育者。方爲合格。婦女軍應遵守之章程如下。一以一家之體面自由及幸福爲前提。二應嚴紀律。三氣勢及信仁。須堅固不屈。四要勇敢。五每遇有命其執行各事之時。須詳審勤謹。迅速堅忍。六務須嚴存體面。克盡乃職。七務須注重生活之樂趣。善養己之身體。對人宜和藹。辦事宜勤慎。八務須尊貴人之意思。彼此宜信仁。以期國家得以安樂。九爭論及私鬭。一概不准。以免失人格。如有違背以上之章程。即認爲侮辱俄婦女。應嚴行懲辦。



◎ 小說 紅印子傳

續第一期

譯者阮伯卓

彼承壺且飲且語曰。請爲余皇祝壽。余皇曾以四等北斗佩星褒獎我。我宜送之達國境而後返。
 (時路易十八爲拿破崙所逐出奔于比利時)此後余將憑藉此肩章爲職著地。若然余之再投身于余隊者亦余義務耳。言時以手攬驛轡且云行矣無須滯此空費有用時晷也。時則彼我兩人結侶前進相距離者僅數武地。余常注目視彼而曾無所問訊。以余生平最愛靜默不效軍人常態。常摘拾他人之事故以爲談資也。

余偕彼寂然無語。望此茫茫可畏之前路。行行走走。約達一里路之四分一。彼因驛足疲病。暫頓路傍一憩。余亦下馬以傾注余長靴中沒脰之雨水。

彼笑謂予曰。君之長靴無亦已。膠結君之雙腳矣。予曰。然。曾四日許。予未之脫去也。彼又出乾燥之音調而語云。噫。浸假八日後。則誰復記憶及此等光景。長路中。跚跚獨行。亦太嫌寂寞。然今日之日方知無羈絆者之能自由。君乎。君其能審我車中之內容乎。予曰。否。彼曰。車中無他物。一婦人在彼也。予曰。然耶。非君言。則予無從知也。予言及此。復躍馬徐步。彼亦尾予行。

愁雲淫雨之天地中。偶得一伴侶。雖跋涉亦忘其苦。然予見彼人疲驛病欲爲行路客。作一慰藉語。奈予不慣對人爲無益之口頭話。姑亦置之。無端彼復告予曰。此粗惡之迂馬車。及其小驛。吾購之殊太廉。然路行雖遠。予僅恃此足矣。予曰。君若疲於足。請以予馬代步可也。斯時予見彼意幾若疑。予有隱笑。彼之車中人者。然以予纔對彼之語意。殊寬簡而鄭重。故彼心亦稍舒慰。薄予鞍。撫予髀。語予曰。君乎。可人哉。紅衣派中得如子者。亦僅見耳。

於彼宣呼我等軍人紅衣派之名號時。其辭調甚爲酸峻。此無亦由我等品級高而服用侈爲當世軍人所妬視者宜也。繼聞彼續其辭而語予曰。足下好意。予誠感謝。然予不敢重煩矣。以予生平不愛馳馬。况予乃步隊中人也。予曰。竊料如中佐者。其必乘馬之將校乎。彼曰。然。大約一年間。閱兵時候。曾一次命騎。然所乘者僅備馬耳。予也。水軍本色也。今復入步隊。故馬亦非予所適。

行行約數十步。彼曾以目視予。然予默不一語。彼乃語曰。君誠愛恬默哉。不然想必大異予所言也。予曰。果有異聞乎。予誠過耳失之也。彼云。試瀆君一聽。我所以脫離水軍籍之顛末。異乎否乎。予曰。然。中佐試言之。寒風瑟瑟。講話以溫君體。予聞之亦忘其爲雨濕自背達脰之光景。我中佐斯時方出以鄭重之態度。掀髯一笑。整頓頭上所戴之漆布帽。聳步兵之雙肩。出椰子壺一飲。以足鞭驃腹。促之走。然後聞始講話。

▲ 第二章 紅印子

中佐曰。余愛友乎。余請先敍余之家世。與君聽。余生於貝雷斯德城。余父曾充衛兵。故余九齡時。已入童子軍。得享軍士薪俸之半數。但余生平酷愛航海。一晚得暇。出遊於城外。見有某商船停泊於此。問之知其爲將航往印度。斯時余浮海心熱。遂躲身於此船底。以待其行。放洋後。船中人方望見予。船長不忍投予於大海以饗魚腹。於是命予爲一小水手。嗣後予屢於海上建奇功。迨至革命時代。予已爲一小商船之船長。其船亦稍淨潔。而沿海浪者已十五年許。適其時海軍部遺缺多數之軍官。故必以各商船之船長代任。予因此得帶領一戰船。名馬拉號。

一七九七年十二月二十八日。予戰艦得派往該安之命令。艦中載兵卒六十名。及被徒刑者一犯。

予尙憶前此得罪者爲一百九十三人。此犯卽其一也。其他諸犯則於數日前已由德吉艦解往他處。予艦任務。則單獨純爲解該一犯往該安安置。然余又得政府訓令。謂行時宜優待這犯。臨行之際。監國府曾授余秘令一封。(監國府乃法國革命時代一七九七年之政後爲拿破崙所傾倒者) 封外蓋紅印者凡三。其中間印跡最大。並附密訓曰。凡航海時未抵達第一緯度第二十七二十八經度之地點。則禁不得開閱。卽示抵到赤道線。然後準發書以觀也。

咄咄此怪物。更爲余所肩擔。書封極大。而樣式特別。粘封牢固。雖百計亦不能窺其一墨。余本無迷信性質。然望之亦令人不寒而慄。予置彼於英式鐘錶內之一小玻璃器。懸於予寢室內之榻頭。且予此榻乃一航海家特製之樣式。君乎。君何異於此榻之爲用乎。嗟。予誤矣。君今僅十六歲耳。予想皇后之寢室。未必光潔整頓。如一水手之房榻。凡所裝置陳設物。都以小釘螺印於一處。雖船身搖動。亦不能易其位。其用具則視乎所駕之船式。及各人之房艙而製造。余之榻卽爲予之一木箱也。開之爲臥床。閉之爲坐檯。其妙巧可知也。且於用膳時。以予榻代食桌。則予復坐於房中之各酒桶上。其房板亦光澤奪目。况余所馭之艦。別饒興味。余時於此中作種種遊戲法。足以寓目暢懷。令人忘其凌風洶浪之苦。此次開行。其光景亦甚愉快。以至於、然語此殊太驟。余將逐漸爲君敍也。時西北風起。余方以此書裝置忽見彼被徒刑之少年。携十七歲許之麗人偕入余寢室。余問某年紀。則以十九歲對。其人秀偉。面帶青色。以堂堂男子。而髮體若此淡白。殊非壯健。雖然亦不失其爲偉丈夫之資格。臨事應物。雖古人未有過。此後余將悉爲君述。則當了如矣。某親曳小姐之手。以臨予前。爲其所愛者一介紹。而小姐則櫻口含笑。柳黛呈妍。無異一垂髫之兒。彼此形隨影共。依依天邊雙棲鳥。余覩之亦殊引爲悅目。余告之曰。衆子其來問候我老船長乎。我之載衆子行。無乃太遠。

然無妨也。吾儕相知。正在此時。會耳。款客忘衣。請小姐其寬恕。予方釘此絕大之怪物於此房壁上。衆子誰肯助予一手。可憐哉。此最可珍愛之。一雙仙鳥。夫也。助予椎妻也。助予釘左。携右。有惟予所役使。彼嬌癡之少女。獻弄於予前。曰。船長爺。左云乎。右云乎。蓋以予船上下於波浪間。予之懸鐘忽而左而右也。至今日予耳中。猶彷彿憶及彼少女之音調。曰。船長爺。左云乎。右云乎。時予亦戲語之。曰。來予可愛之女。毋惡作劇。予將囑汝丈夫示罰。其妻聞予語。乃懇抱其良人之頸。一吻。嬌姿百態。想亦能令彼愛者魂消。而予與彼輩之感情。至此亦愈密。

且也。此次航行。天氣和靄。船中都是黑種人。故予每於餐時。必招彼兩人共膳。一日餐竟。予見彼兩人交目凝視。一若生平不曾相識者。予適以語嘲弄之。彼輩亦偕予一陣葫蘆大笑。想當時從旁苟有人焉。突見予等情狀。無不目爲狂癡輩。然晨夕間常得覩此。依戀不捨之一少年侶。殊令人忘倦。彼兩人所坐皆歡。所食皆甘。而其食料亦不過船中諸人所用之一種粗麵包耳。惟予於共膳時。則常酌少許瑞典火酒一杯爲量。令不失船長風體。彼等睡於一吊床上。隨船之傾勢而搖蕩。不啻雪梨雙果。包置於一溼巾內。彼兩人嬉笑終日。余亦引以自娛。未嘗一向彼詰問。私念我生活於海面上之天地。罕與人世接。卽知彼之姓字行狀。亦胡爲者。余之載彼兩人。亦不過如載一雙翡翠耳。相與周旋者一月。余視彼兩人。不啻如其子。日日招彼至余房。彼兩人侍坐余側。其夫則就桌前寫字桌。卽余前此所敍之臥榻也。有時余亦命彼指點經緯里數。不多時操習精練。不減於余。余見彼若此聰慧。不覺驚服。其婦則坐於一酒桶上。從事於針線。

未完



時談

前各期本誌已略舉今年歲首至八月期內世界各重大之事故。如俄京之革命。中國之內變云者。茲請從八月以後世界發生之事故續記之。

今日所稱爲世界大事記者。惟有歐戰之一問題。蓋此問題其影響於世界者甚鉅也。但近日戰爭之情狀。較於前數月無甚變易。自八月之下旬。至今九月之中旬。則戰事之劇。惟法軍與意軍方面。若其他各陣地。無他活動。除却俄軍方面。因內亂之故。致使波羅的海岸之利加 (Riga) 城。遂落於德人之手。是可惜也。

法軍方面。法軍之陣線。可分爲三大段。上之一段乃爲接夾比境之佛蘭德雷 (Flanders) 平原。法英軍所共據守也。中之一段。乃爲愛士尼 (Aisne) 河流域。下之一段。乃爲末斯河之左右兩岸。而華頓城則正其中心點也。在佛蘭德雷平原。雖遇水潦。而法英軍能前進於蘭日馬耳克 (Langemarck) 連士 (Lens) 城之周圍。及士丁壁 (Steenbeck) 等地。在比境。則法英兩軍與德軍交戰於愛士耳 (Yser) 河岸上。及意貝雷 (Ypres) 城之附近。雖德軍反擊甚猛。而法英軍非特能持守陣地。且又取次前進。但戰爭之劇烈者。以華頓城爲最。此陣地長線約達十八吉羅米。深約二吉米。自阿窩古耳 (Avocourt) 森林。至貝尊尾斯 (Bezonvaux) 北面。以及末斯河之兩岸。交壘射擊。日以繼夜。礮位可以千計。砲聲隆然。德軍以預備軍之五師團。及四百砲隊。以有毒氣之砲彈。向聯合軍射擊。其抵抗可謂得力。然聯合軍亦占得勝利。統計聯合軍得勝之寔數。如左。戰俘七千七百人。(內軍官二百

人）敵軍傷兵六百人。獲礮四十五尊。機關槍二百枝。八月二十五日。法軍攻入阿窩古耳森林之中部。及末耳都末（Morthomme）山地。占得敵軍要區之三百零四標高地點。前進得二吉米餘。據法軍陣地各英國之通信者所評論。則謂此戰乃法軍最重要之一役。以其因此高地占據。而可以奪得末斯河岸上之各良好陣地也。現日則兩軍於此河岸上相持甚猛。法軍之攻擊於佛斯（Fosses）及古列耳（Courrières）之各林分。愈見進步。處處皆能擊散敵軍之反擊。雖然勝敗尙未能解決。法軍各小戰既獲利。自秋徂冬必有一回之決戰。以期克奏大捷也。

意軍方面。意軍本前進於意尊蘇（Ysonzo）河之左岸。應用飛艇二百隻。贊助步兵以向奧軍砲擊。大礮約數千尊。而英國之重砲未語及也。現已進行至黑耳曼達（Hermande）山分。在此奧軍守勢甚周密。全以輕兵應用。苟此山地攻克。則進入德利斯德（Trieste）城。特反掌事耳。但最近之顯然戰績。乃爲占獲孟德三達（Monte Santo）山各隧道壕壘及溪徑之戰役。奧國第十二師團之全部。本以鐵團得名。亦於此地被潰散。此戰奧軍之被損害者。約達七萬人。意軍攻拔孟德三達山之後。則對於俄里斯亞（Gorizia）城方面。可免危險之憂。據丹麥京來電。則奧人亦公認意軍攻擊在意尊蘇河岸上之兵數。多至六十五萬人。今日則意軍本循序前進於班西撒（Banzizza）高原及三俄貝列羅（San-Gabrielo）山界。確聞意國已募集得四兆二百萬兵數。然則不日亦必有一次之決戰。其勝利之希望。當屬於意軍居多。

俄軍方面。並魯馬尼及其他各陣地。在俄軍則因國內之變亂。故於戰況頗不利。曾經幾度之退却。據九月四日之電。則謂利加城已被德軍占領。而俄軍則被退歸於阿阿（Aa）河之北。聞德軍據守交通道路。欲設計以進入俄京。俄政府已有遷都之議。然其後又聞此議姑從緩。以其現時之俄

京未有何等之危險也。但質言之。則俄軍之情勢。頗形險象。此亦由國中之政變所致。吾儕另於下述。因俄軍之失利。故魯馬尼方面。魯軍及俄軍亦被挫折。現今俄軍之全線。方竭力據守。待有良好時機。方轉行攻擊。凡各重要之陣地。幸未落於敵人之手。

其他各陣地。形勢未嘗變換。無有可述之大戰役。在塞境。則保軍只向末那斯德耳(Monastir)城砲擊。都市之大部分被燬。兩軍相拒於末那斯德耳城之北。在撒羅尼克(Salonique)亦幾次無故發火。都市之被燬者。幾達其半。然聯合軍住紮於附近地點。不受損害。城內難民約數萬餘人。流離失所。聯合各國及希臘國曾爲之助賑。希人態度。今日已顯然加入聯合系方面。賴國中之首相維尼
斯羅斯(Venizelos)氏。下戒嚴令。凡德國之餘黨及其亂黨。今亦勦除幾絕云。

總而言之。現日之戰况。與月前無異。陣地之形勢。雖稍有變易。然聯合軍方面。勝利之局。可以預卜。吾儕所希望者。俄軍之內情。使早一日穩妥。則聯合軍之勢力。當早一日發達也。

△世界各國之外交及政治

▲俄國內政 俄國八月前危變。固已成過去辰代。幾謂俄國內政之艱關。幸由此而超脫矣。不謂一波未平。一波又起。臨辰政府固屬於加連士奇首相之掌握中。首相之謀國極熱。宜乎得俄民所信仰矣。八月之下旬。民主黨之哥尼羅輔(Korniloff)氏爲統帥。人人皆謂統帥當與首相同意相爲協助。九月三日。又接俄京來電。謂臨時政府已屢次表同情於哥尼羅輔統帥。準依統帥之請。屬於整頓軍紀一事。乃其後數日。接得來電。謂陸軍總長撤園古夫(Savinkoff)氏與首相加氏相抵牾。遂至辭職。而哥尼羅輔統帥。則幾若與撒氏相黨與者。繼此忽於九月之十日。

復接左列之各電。不啻霹靂一聲。從天而降。而此中紛擾情狀。令人無從解索矣。巴黎九月十一日來電。謂哥統帥迫加首相宜交國中之政權於自己。加相不肯。又迫哥統帥辭。

職。暫交統帥職權于革林貝斯綦大將(Klombousky)。比得羅革拉(俄京)及其附近各地。皆設軍律。政府委亞麗夫(Alexieff)大將(即舊統帥)領統帥之職。亞氏堅辭。哥尼羅輔氏之軍隊。則向俄京進發。約距離二百里之地點。加首相下令使停軍以待命令。閣員亦盡請辭職。俾加首相得有自由行動之權。在比得羅革拉之統監。亦上辭呈。加首相遂拘監多人。國內人民大為震悚。恐兩方幾若以兵力相解決。

繼此復接一電。敍俄京九月十一日之通報。情狀稍為明瞭。原俄京兵黨及工黨之委員會。以一書通報于水陸軍委員會。謂哥統帥現方利用軍隊。以破壞革命黨。及傾覆臨時政府。請遍告各軍人。毋誤會聽從哥統帥及同等各將之命令。觀此則知哥氏此舉原欲傾倒加連士奇之臨時政府。然亦未知此謀發起之原因。果何在也。

據後數日之消息。則謂哥氏之騎兵。已達距離俄京三十里之地點。哥撒克(Cosaques)軍之代表。則來與加首相坦認。謂將竭力支持。免生內變。外間傳說謂哥統帥聲稱政府中多有黨德者。故決擁兵來以倒壞之。其中虛實未辨。仍嗣來消息。則愈形噩耗矣。

十三日來電。則謂政府軍隊與哥統帥軍隊相距頗遠。未至交戰。然政府未必哥氏以此干休也。繼接一電。則謂情勢尙形騷擾。以其只知政府一面之報告。其他一面則尙未明瞭。革林貝斯綦領統帥之職。加尼綦(Kenique)及窩隆(Volong)兩大將。帶領西北軍方面。亦聞與哥統帥相連結。而哥氏則聞已抵到俄德支那(Galchina)與俄京薄接。又一電謂各將多與哥統帥表同意者。而正革林貝斯綦統帥亦其中之一人。此後加連士奇復領統帥之職。亞麗夫則為司令部總長。最後之消息。則謂加連士奇及亞麗夫氏方與哥尼羅輔氏相調停。若不能俯從。勢必至流血云。

加首相今年僅三十五歲。俄京未革命前之一星期。固莫名之一律士已耳。及革命後之四日。而名震全國。爲新政府之領袖。公平時曾預工黨秘密會。及革命事起。公知彼黨與舊政府反對過激。乃唱立暫時政府以調停之。其英雄手段可知也。生平好雄辯。及登相席。亦得士卒心。近日評俄國時局者。皆推首相爲俄國之第一人。此次擇國家多難之日。力撑大局。百折不回。其謀國之熱心爲何如也。

▲法國內政。法國內政亦纔經過一困頓之時代。舊內閣總理利勃 (Ribot) 氏。因意見不合。屢請辭職。上星期已書呈于法國總統矣。此事之原因。由有一報館主人安迷雷達 (Almeyreda) 氏。受德人之賂金所致。此案既發。安氏於獄中自盡。政府因防閑不謹之故。內務總長知自己有連帶責任。緊請辭職。由是全閣皆上辭呈。民國總統遂命陸軍總長班雷偉 (Painlevé) 公。組織新內閣。班公於數日內。運動不能成立。以公乃社會黨人。而社會黨則初意不欲預閣政也。其後調停就緒。至九月十二日。接得來電。謂新內閣之組織如左。

內閣總理兼陸軍部班雷偉 (Painlevé)

司法部總長北雷 (Péret)

外務總長利勃 (Ribot)

內務總長士的 (Steeg)

海軍總長蘇米 (Chaumet)

軍械部總長路梭 (Loucheur)

財政部總長革路德 (Klotz)

屬地部總長北士奴耳 (Besnard)

工部總長格羅維 (Claveille)

學部總長園仙 (Vincent)

勞動部總長利那耳 (Renard)

商部總長格黎曼丁 (Clémentel)

農部總長達偉德 (David)

軍需部總長龍 (Long)

外國派遣部佛革連貝耳翁 (Franklin-Bouillon)

上列之各員職外。復委仁四員爲國務卿。即爲波都 (Barthou) 里翁貝耳草盧 (Léon Bourgeois) 都迷 (Doumer) 及貞都悲 (Jean Dupuy)

此四員不帶領特別任務。得與內閣總理。海軍長。軍械長。有充入戰事會議之權。而戰事會議之目的。在乎贊助水陸軍之各司令部參謀部屬於作戰之計畫。此會議之外。復設一經濟會議。以國務卿。都迷公及商部長屬地部長工部長軍械部長軍需部長充爲會員。

▲亞耳日丁 (Argentine) 與瑞典及德國之抗議。

九月七八等日。華盛頓政府纔發覺住南美亞耳日丁京之。

德使

陸貝耳 (Luxbourg) 伯爵以祕密數字假瑞典公使電達于瑞典外務總長。使之轉達于德國。因德

使恐自己拍電。不免聯合各國搜查。故假手于瑞使。而以各國戰船商船之行期電知。使自己潛艇。得以要擊。瑞典向來與德關通。固爲各國所注目。近因事洩。亞耳日丁民聞之大激憤。運動與德國及瑞典國反對。亞政府已發給護照。使德使歸國。及致抗議書于德政府。瑞典外部則辨明謂瑞公使不知德使之數字。故誤受委托代達。非有他意。况此事發自美國。虛寔未辨。須的確查究。然後方質問德政府。現未知德政府答復亞耳日丁之抗議。爲何如也。

▲ 美國 美國自對德佈告宣戰以來。

對於聯合國。則凡財政上之援助。與夫軍需品之供給。無不推誠布公爲之盡力。又派遣

艦隊。以協同動作於海上。增加兵隊幾十萬。以助戰於疆場。終以貫徹其爲世界勦滅公敵爲目的。致于美國總統。然美國總統威爾遜。嚴辭答復。幾若以爲對於驕悍之敵。須以根本之勢力勦滅之。近日羅馬教皇以議和之通牒。據華盛頓電。八月下旬。美參議院已贊成總統答復教皇之文。其文中略謂此戰尊旨在拯救世界自由人民。使之脫離於無責任的政府所統治之軍國威權下。彼敵人欲囊括全球。不顧條約及國際法律。擅開戰禍。血潮迸發。瀰漫全歐。今日彼猶頑抗爲世界五分之四之公敵。此種兇燄。乃由德國之殘忍元首所爲。吾輩不忍使全世界歷史受德人所把持。今若依教皇提議之辦法。則徒使德政府勢力復活。徒使各國必永遠聯盟以拒德人。徒使新產生之俄國。終受德人之狡計所煽亂。試問和局當以何爲根據。豈憑各國之信仰心。抑在條約之空言乎。吾輩以爲德政府須寔行賠償戰爭中殘暴之破壞而後可。蓋和局必須以公理正義與人類公權爲根據。德國當今執政者之言。苟無德國人民自己志願之切寔。證據可爲世界他國人民所可承認者。則吾輩不能視爲可以持久之担保。苟無此担保。而僅與德締結休戰之和約。屬於減縮武裝。尊重仲裁。處置土地。恢復弱國之等款。試問此條約果可恃乎。是以吾輩必俟得中歐列強民意之新證據。而後始可以言和云。

▲ 英吉利 近因德國社會黨議和之運動。欲得萬國工黨之助力。然協商系各國。取積極的行動。以不能勦除德國之帝政主義。卽無復有確商之餘地。試觀英國工黨之意見書。則可知矣。據倫敦電報謂八月二十一日。工黨在倫敦特別協議。決定以一意見書詳達於協商國及萬國社會。該

意見書。聲稱德國帝政主義之獲勝。即毀壞歐洲之民政及自由。故當要求比國之自由與賠補。並炤波蘭人之願欲。以調處波蘭問題。及歐洲被強迫割據之人民。應得自由為要。該意見書以各國之舉行民政。乃為阻止將來戰務之最善方法。為今之計。宜即設立一邦國盟會。逼令世界各君主國加入。此邦國之盟會。當設一萬國高等衙門。及一萬國立法院。並請以巴爾幹之人民。或萬國委員會。調停巴爾幹之間題。並要將亞撒盧連兩州。歸還法國。又要求各國之猶太人。皆有平等之權利。並望訂合約使土屬小亞細亞之巴里士天省。為自由之猶太國。至于亞棉尼亞美蘇普坦美亞亞拉伯之地。不能復歸土耳其之專制。此等境土。應炤非洲熱帶之屬土。同樣待遇。並由各國盟會之委員治理。倘欲要世界之和平。須得土京君士旦丁堡。作為中立自由口岸。並議令非洲熱帶現在歐人之藩屬。包括禮巴里亞在內。轉交各國盟會。由公正委員治理。作為非洲獨立自主之中立國。戰務之後。世界之食品與生料之短缺。將由萬國訂約。將多餘之貨物。互相交換。為之救濟。又戰後各國政府。宜以公共之工程。安插工人。免致失業。並反對生計競爭之計畫。及力勸限制關稅。又要頒行法律保護工作之人。至於規復戰役殘破之地方。除比國外。應由萬國公款擔承。該公款將由交戰各國。按炤其所施損壞之責任。責令捐助。又請設一衙署。考察及懲責各政府之有罪者。而於無人道及殘忍之潛艇。為尤要。並請興復萬國社會黨。作為平和最好之保券云。因此意見書一出。德國社會黨之運動。大受打擊。據倫敦九月三日電。謂瑞典京協會之創辦人。現因倫敦協會之結果。故將九月九日集會之意見棄置。且展緩無期。

近來德人雖用潛艇政策。擊沉商船。發表擊沉船隻之數。其意在使德奧人民發生英國不能久持戰局之感想。然觀英相喬治在下院發表關於戰事之要論。則戰鬪力誠有增而無減也。其發表之

言。概略舉左之數事。屬於英國糧食一層。去年八月國內存麥六百五十萬瓜特。(當中國一石六斗)今年八月存麥增至八百五十萬瓜特。雀麥雜糧存積亦多。目下耕植之地較前多一百萬英畝。今年收成可望豐盛。存糖亦加增。明年春季當有八千架種田機器。糧食接濟大可無慮。若夫船舶之數。則七八月之間損失可望減少。而新船刻方加速建造。復在國外定造不少。一九一五年。英國造船六十八萬八千噸。一九一六年。造成八十三萬八千噸。今年上半載已造四十八萬噸。下半載則可造成一百四十二萬噸。內有一百十萬噸係在英國建造。統計今年新商船共一百七十萬噸。又得美國之助力。則不獨明年之噸位可望充足。即後年噸位亦不缺乏。至於軍事情狀。則雖今年俄國因國內困難。暫爲遲緩。德奧於此正大可有爲。乃觀其能力所及。不過保守陣地以拒英法而已。况敵軍又大敗數次。死傷損害無算。然此猶在俄國未能奮戰之時也。他日俄國復振。美兵加入。則敵國尤不堪設想矣。

▲ 奧國最近之政潮

今日戰事。

奧國隨德國之驅策。而冒昧開端。其國人蠻橫之手段。大概可想見。然國中官場。又以吞公肥私爲能事。貪贓之風。有耳目者所共見。

安望其起國人之信用。而籌帷握算。以制勝於疆場上乎。據近日

德國報章。載稱奧京政界纔發生一駭人聽聞之舞弊案。司法陸軍財政三大臣。已因而辭職。
原有弗蘭慈博士者。前爲奧京儲蓄銀行總辦。以不合法之手續。售糧食於陸軍。取價之高。
大異尋常。而三位大臣。又與弗氏狼狽爲奸。以充分其利。
故弗氏被傳時。三位大臣設法營救。以期超脫其罪。裁判員調查文件。查有公文一件。
係三大臣所造。弗氏賴此得以逃法網。因是裁判員決意傳告三大臣到庭訊問。三大臣自認從中營救。不稍隱諱。財政大臣遂即宣告辭職。未幾司法與陸軍亦上辭呈。
此案頗惹起奧京政界之激刺。蓋以官場之醜態。既被揭破。宜乎國人因之而解志也。

亞東之部

日本辰事

自歐戰發端以來。日本與協商各國取同一之行動。對於太平洋面。擔任防禦之責。而且又助歐戰之寔力。由此而得增債權之勢力。擴張商業之經營。戰勝後日本在世界之地位。不問可知也。茲姑摘某華報所述一議會案。以覘日本外交之政策。

△ 日議會關於外交之質問案

日本貴族院預算總會於七月初九日午前九時三十分開會。是日寺內首相及本野外相各出席。首由石黑忠德男質問外交政策。本野外相乃詳述最近外交之經過曰。此次世界之大戰。何時終局。雖難決定。而其結果之影響世界大局。亦無待論。帝國對於此事之態度。現正在熟慮中。而以爲將來之間題。首在平和會議。其時帝國當爲如何之提案。雖難明言。唯戰後使遠東之平和。爲永久的。則認爲至要。於此務明帝國之地位。以保證帝國特有之權利。關於媾和之事。帝國亦必勉力徹底其主義。一面更於友邦取協同之動作。至戰爭終局。當歸與國之勝利。固屬必然。而亦難斷言。特保障各國之利益。則不可不依於舉國一致也。又對華外交之方針。以不容喙中國之內政爲主義。故對於此次之復辟。無何等干涉之事。此則可明言者。本月四日已本此意發出訓令矣。黎大總統之避難於日使館。蓋爲事寔而因保護帝國臣民。已由天津派兵赴京。取適當之方策。又復辟派對於天津之段派方面。雖欲請爲調停。而帝國政府却之。唯以北京方面之意見。通知於天津方面耳。嗣江木千之氏起而質問曰。現內閣之對華外交方針之根本方針。予甚苦於了解。既漫曰。

中日親善。然據聞華人排日空氣瀰漫於四百餘州。使今後苟有機會。彼等亦必勉力普及此思想。政府亦擬放任此狀態而不問耶。本野外相答稱帝國於中日親善主義。無不加意維持。予不信排日思想之普及於四百餘州。無論何地方何黨派有此思想者。非特日本之不利。即在中國亦不利。故兩國民不可不互相撲滅此思想也。江木氏更詢機會均等主義之不快於華人。不利於日本。本野外相答言縱他國享得利權。日本安能作旁觀以自棄。故政府亦必如列國之所明言。務執此主義而進也。次由段谷芳郎男質問關於滿鮮鐵路統一僅有一法律案。單簡如斯。果能寔行此大問題否。請略說明其次序方法。寺內首相辯稱南滿洲鐵路會社於鐵路外亦兼營其他之事業。今移朝鮮鐵路之經營於滿鐵會社。統一滿鮮鐵道。以備一朝有事之用。寔必要之計策也。次久保曰。讓男質問滿鮮鐵路之統一。不與行政統一並行似難舉。寔無效。政府將同時並行二者否耶。寺內首相答稱如可並行。即同時並舉。後江木千之氏質問滿鐵總裁可兼任關東都督耶。又委仁國有鐵路之鮮鐵於商業公司不違法耶。寺內首相答稱滿鐵雖為股份公司。而其成立係依特殊之形式。與單純之商業公司異趨。故以總裁兼任都督亦無不可。

▲ 美國鐵材禁輸令之影響於日本

日本自近十年來造船事業異常發達。而自歐戰後更有一躍千丈之勢。但其材料都取諸英美。自英國禁止鐵之輸出。於是只仰給於美國。前者日本造船業曾向美國立一定購四十萬噸鐵之契約。距至美國與德宣戰後。美總統乃於八月九日下鐵材禁輸出之命令。則恐前此契約亦隨之而破棄。日政府對於此事之善後方法。頗費經營。而造船界亦組織一。美國鐵材輸出解禁期成同盟會。要求政府向美干涉。由日本近來已擔任於協商各國。屬於軍艦及軍需品之供給。况日本

輪船受協商各國傭雇。而任運輸於大西洋面之職者。殆達四十萬噸。今鐵材驟減。則有船身不足之患。因是故造船界之巨擘。如三菱川崎淺野大阪鐵工所等。終日集議。要求美國網開一面。以維持船業。確知日政府必向美政府交涉。請設一特例。以遂其救濟之方法。

日本赴美大使石井子爵已於七月二十八日由東京啓程赴橫濱。棄高麗號船渡美。八月十六日。日本赴美議員團已選定政尾藤吉爲團長。望月小太郎爲副團長。權原悅次郎爲理事。豫定九月上旬起行。

◎ 宣戰後之暹羅國

暹羅自與德宣戰後。上自皇室。下至人民。莫不信賴協商系。凡國防及外交。都採從日英規範。現該國閣員寔行處理國政者。爲外交大臣納陌阿格氏。該氏深荷暹皇之信任。現皇帝自一千九百十二年登極。至今不過三十七歲。尙未婚娶。幼曾負笈於英京。畢業於阿苦斯夫何島大學。誠學博識宏之君主。千九百零二年赴日考察政治。後歸國。即將陸軍大行改革。廢從來之象兵。採用日本兵式。現有軍隊十一師。每師由步兵二聯隊。騎兵一聯隊。砲兵一聯隊。工兵一中隊。輜重兵一中隊。機關槍一中隊。衛生兵一中隊。組織而成。訓練服裝。都取範日本式。即軍需品亦自日本採買。初見之幾疑暹兵爲日本兵。陸軍大臣那阿必耶氏。前仁次官多年。經驗宏富。海軍則未得如陸軍之整齊。軍艦自千噸以至三千噸者有六隻。水雷艦約六七隻。彼國與德宣戰。固非出兵赴歐。對於戰事勢力。雖無直接影響。然自經濟上觀之。則德國寔受莫大之打擊。蓋德國多年經營。凡暹羅之交通機關。無論陸上海上。都占有大部分之勢力。該國各港之船舶及國中鐵路。其技師以下。都用德人。幾

年來歐戰發生。彼國尙守中立。則德國商船之在東亞者。無不以暹爲逋逃藪。此等商船自千噸以至二千噸者。共有十隻。至今宣戰。則此商船都足供聯合國之使用。至於陸上所經營事業。皆當歸潰滅。而凡僑居該國之德人。亦皆束手待命。無能爲矣。

●中國時事談

中國今日對德奧宣戰。誠可加入世界自由之團體中。吾儕回憶中國自對德絕交後之五個月。因種種延緩其第三步之行動。而致惹起兩度之擾亂及內訌。是可引爲憾惜。今日則中國北京政府已貫徹其行動。於八月十四日宣戰。繼此而德國銀行由中國接管。德國船隻由中國佔領。德國雇員從此亦罷免矣。凡德人所經營之事業。都見消滅。而中國之決心。至此可見。據某外報所論。謂中國此次宣戰。吾人雖不期望中國軍事上之助力。但能遏制德人在遠東之陰謀。寔予協商系方面以寔際之贊助。蓋此等陰謀。不僅爲協商各國之敵。而正爲中國之敵也。今試述中國宣戰辰之手續。中國自與德絕交後。則凡德人在華之交涉。都由荷蘭使署接管。故中國宣戰書。不直交于德國而只交荷蘭使署轉致。於八月十四日上午十鐘。北京政府以炤會書致于荷使云。

德國施行潛水艇計畫。違背國際公法。危害中國人民生命財產。曾於本年二月九日。向德政府提出抗議。並聲明萬一抗議無效。迫不得已。將與德國斷絕現有之外交關係等語。不意抗議之後。中歐列強潛水艇仍繼續擊沉中立國及交戰國之商船。因而致多傷中國人民之生命。中國政府不能不視爲抗議無效。遂於三月十四日。向德政府宣告斷絕外交關係。然其時中國政府猶希望德國所採違背公法傷害人道之計畫。或因世界之公憤而有所變更。今則並此亦已絕望矣。中國政府本其尊重公法保護人民生命財產之尊旨。對此情形。不能久置不顧。故中國政府特聲明自中華民國六年八月十四日上午十時起。與德國入於戰爭之狀態。所有中德兩國於一八六一年九月二日所訂中德條約。一八六十年三月三十一日所訂中德善後章程。及現在有效之其他條約合同或協約。無論關於何種事項者。均一律廢止。至一九零一年九月七日所訂之條約。及其他同類之國際協議。有涉及中德間之關係者。並從廢止。又中國政府對於海牙保和會條約。及其他國際協約。一切關於戰時文明行

同日中國對奧亦與對德取同一之行動。致奧使照會云。

動之條款。仍遵守不渝。合並聲明。除電請丹政府轉知德政府外。相應照請貴公使轉達德政府爲荷。中國政府前以中歐列強施行潛水艇計畫。違背國際公法。危害中國人民生命財產。曾於本年二月九日向德政府提出抗議。嗣以抗議無效。於三月十四日向德政府宣告斷絕外交關係。並經照達貴公使在案。現因中歐列強此項違背公法傷害人道之計畫。毫無變更。中國政府爲尊重公法保護人民生命財產起見。不能久置不顧。貴國現與德國既爲同一之行動。則中國政府對於德奧兩國不能有所區分。茲向貴國政府聲明。自中華民國六年八月十四日上午十時起。本國與貴國入於戰爭之狀態。所有中奧兩國於一八六九年九月二日所訂中奧條約及現在有效之其他條約合同或協約。無論關於何種事項者。均一律廢止。至一九零一年九月七日所訂之條文及其他同類之國際協議。有涉及中奧間之關係者。並從廢止。又中國政府對於海牙保和會條約及其他國際協約。一切關於戰時文明行動之條款。仍遵守不渝。合並聲明。除電本國駐奧公使轉達貴政府。並請發給出境護照外。相應備具貴公使并貴館館員暨各眷屬離去中國領土或需沿途保護之護照一件。照送貴公使。請煩查收爲荷。至貴國駐中國各領事已由本部令知各交涉員一律奉給出境護照矣。

中華大總統對於國內之布告。 我中華民國政府茲以德國施行潛水艇計畫。違背國際公法。危害中立國人民生命財產。曾於本年二月九日向德政府提出抗議。並聲明萬一抗議無效不得已將與德國斷絕外交關係等語。不意抗議之後。其潛水艇計畫曾不少變。中立國之船隻。交戰國之商船。橫被轟毀。日增其數。我國人民之被害者。亦復甚衆。我政府不能不視爲抗議之無效。雖欲忍痛偷安。非惟無以對尙義知恥之國人。亦且無以謝當仁不讓之與國。中外共憤。詢謀僉同。遂於三月十四日向德政府宣告斷絕外交關係。並將經過情形宣告中外。我中華民國政府所希冀者和平。所尊重者公法。所保護者我本國人民之生命財產。初非有仇於德國。設令德政府有悔禍之心。恤於公憤。改其戰略。寔我政府之所禱企。不忍遽視爲公敵者也。乃至斷交以後。歷時五月。潛艇之攻擊如故。非特德國而已。卽與德國取同一政策之奧國。亦始終未改其度。既背公法。復傷害吾人民。我政府責善之深心。至是寔已望絕。爰自中華民國六年八月十四日上午十時起。對德國奧國。

宣告立於戰爭地位。所有以前我國與德奧兩國訂立之條約合同協約。及其他國際條款國際協議。屬於中德中奧間之關係者。悉據國際公法及慣例一律廢止。我中華民國政府仍遵守海牙和平會條約。及其他國際協約。關於戰時文明行動之條款。固敢逾越宣戰主旨。在乎阻遏戰艦。促進和局。凡我國民宜喻此意。當茲國變初平。瘡痍未復。遭逢不幸。有此釁端。本大總統眷念民生。能無心惻。非當萬無苟免之機。決不爲是一息爭存之舉。公法之莊嚴。不能自我失之。國際之地位。不能自我圮之。世界友邦之和平幸福。更不能自我而遲誤之所願。舉國人民奮發淬厲。同履艱貞。爲我中華民國保此悠久無疆之國命。而克大之以立於國際國體之中。共享其樂利也。布告遐邇。咸使聞知。此布。

大總統令。現在我國已與德國奧國立於戰爭之地位。所有一切應辦事宜。著各該管官署查照現行國際公法慣例。妥速辦理。此令。

吾儕近來覩中華辰局。幾有紛擾之憂。然一自對德寔行宣戰之後。國中各方面。幾若與政府共表同情者。協商各國元首致電申賀。此屬當然事外。據近來確寔消息。則中華政府嗣來久未得西南各省之通電。惟自宣戰以後。兩廣巡閱使及廣東陳督軍。雲南唐督軍。均亦有電來北京。示一致對外之意。而馮總統佈告之文。亦見遍行粘揭。似此一事。幾若可疏通意見。又據近日之調查。則南北兩方面。幾已互相讓步。在北京政府方面。所謂讓步者。其一爲臨辰參議院議員。由民意機關選舉。其一爲傅良佐。僅準帶北兵一旅到任而已。在西南各省。所謂讓步者。其一爲恢復舊國會。縱不能辨到。當另行召集新國會。其一爲元首問題。在此日雖已不成爲問題。然黎大總統未向國會辭職。馮代總統未向國會報告就職。形式精神。均有不合。應速召集民意機關。如法履行。其一爲懲治禍首。雖不能寔行。形式終不可免。此次稱兵造反各叛督。當下一申飭之命令。

觀此則中華內變。調和之希望。其可達到乎。雖廣東於九月初一日開國會非常會。選舉孫汶爲中華民國軍政府陸海軍大元帥之職。然察之南方有勢力者。果能內向於中央政府。則竊恐南方政府亦難乎成立也。吾儕試徐觀其後。

宣戰後各國之對於中國。據九月九日北京專電。則各國公使團已於法國使館會議。決定下列三事。其公文已呈與中國外交部知照。一關稅值百抽五。二庚子賠款展限五年交還。惟俄國祇允將賠款緩交三分之一。三此後如必要時。中國軍隊若得外國公使之允許。可在天津租界經過或駐紮。◎四國銀行團已託日本代理承認。許中國借債一千萬員。聞於八月二十八日下午。財政總長梁啓超與日本正金銀行小田切氏共簽字這草約。二十九日即正式簽押。這債款利息爲七釐。還期一年。以鹽稅餘款爲保證。交款無扣折。以日金墊付云。

● 國內之部

★ 太原匪黨之蠢動 我國北圻境內纔於八九月之交。在太原省蒞。發生一謀亂之事。

察之此事特不過一區域內。狂妄之徒謀蠢動耳。於治安上毫無妨礙。幸保護政府派軍隊即行勦滅。其餘黨不日亦就擒。現下全權大憲已下令集合重罪法庭。以審究各犯案。吾儕切望保護政府。宜嚴懲此狂悖之匪黨。庶使良民得以安業而無爲所擾惑也。此亂事發生。始於八月三十日夜半。今已漸平定云。

★ 沙露全權大憲近日所經畫之大政

今日我國人皆傾向於沙露全權大人。期其護命以造我民福。然則吾儕亦宜舉全權大人近日在西貢所經畫之大政。揭而出之。使我民皆知護我之主人翁。方痼疾在念。宵旰不遑。而東洋希望之前途。必有如願相償之一日也。

據本誌訪事者所來信。則全權大人近來在西貢。凡屬於我國大政。注措甚多。每日自早及晚。坐於辦公廳內。以解決國中經濟之各問題。而屬於爲我東洋設一商船隊之偉舉。今已就緒矣。於九月十三日。大人集合在西貢。凡法人及南人之各商界領袖。籌議此偉舉。人人皆歡忭鼓舞。樂助資本。現已開始製造第一之各船隻。製成則用東洋特別之旗號。以之航行。此商船隊之船員。則以西貢機器學堂之卒業學生。及現方設立航海學堂之卒業學生充之。若然則我南人於海上事業。今亦能步武各國。而乘波逐浪。享有海面空氣矣。

大人之計畫。非僅經濟上已也。近日已準北圻改良法律之舉。以使我國今後國律歸於統一。現又研究整頓國中教育之制度。使趨於同一軌轍。同一尊旨。不至如昔時之混雜煩複。

嗣來我皇上曾屢次對全權大憲。表白其愛國民之熱誠。且切願開化之局。能及早以進步。故

凡全權大憲爲南國籌畫之要政。我皇上無不一意贊成。思協力提挈。以期收效。而於全權大憲。則凡百改革事業。都欲我

皇上爲之主張。蓋其主意欲將來達到良好結果。能使我民感聖君憂民憂國之恩。而堅其愛戴耳。由是故全權大人惟日不遑暇給。與其向來熟曉南政愛護南人者之各貴官。籌定各政。竊思此各政皆底于行。我南興旺之前途。其鞏固者爲何如。若然則我國此後之茶錦江山。莊嚴世界。皆我皇上與沙露全權大人相提携而構造之豐功偉績也。吾儕小民。其馨香而祝之。

★ 南圻新出世之南人法文報

今日我同人得歡迎南圻之一新報友。即爲在柴棍之國民演壇報 (*La Tribune Indigène*) 是也。此

報於八月二十日出世。編輯全用法字。雖範圍及體裁與本誌稍異。而其主義尊旨則同。且與本誌絕對相同之特點。乃報中編輯及管治之責。皆自安南人主之。報館主筆爲阮富開先生。其人博學達識。曾得名於南中也。此報之目的。乃護持安南人屬於經濟及政治之權利。報纔出版。已得西南兩社會之歡迎。其中官界之贊成者尤多。誠哉南國人公益上之偉業也。

本誌欲略譯此報之開幕詞。以爲我中北兩圻閱報之諸君子一介紹。惟一篇大文。纔於柴棍寄到。不能譯登於本期之時談內。是可惜也。今惟敍此篇之大意。略謂當此世界多事之日。創此新報。原欲表明我南人對於大法親密之感情。屬於寔際及智識之進步。固已成爲顯然事。今日之安南人。皆欲諳曉國家上之事故。及表白自己之意見之欲願於政府。且於社會上常懷各個之希望。是故上而政府。當洞知夫國民之趨向。下而國民。當熟悉乎政府之深心爲至要。此報毅然爲政府及國民中堅之介紹人。對於國民則指導提挈於正軌。而監督裁制其踰度之慾望。對於政府則爲民之代表。而披瀝其正當之要求。竊思此目的如得達到於完全地。則我南人之利益。又何可言量耶。本誌同人茲有一語。以表同情於我南圻之新同業友。莊嚴肅穆之演壇。君也晨鍾。我也暮鼓。芹江珥水。遙遙相聞。共此終古也。

● 本報特別啓事

本報創辦伊始。祈買全年報份列貴。至茲期宜惠付買報現銀。凡買芒多寄銀者。宜題交印館主人黎文福認可也。此佈。再者。凡本報寄送而非贈品者。皆視爲全年報份。倘至西曆十一月而未寄還者。本報另委電局來取。其費損當由買報人擔承。此附佈。

南風雜誌謹白